



رسائل لم تكتب



هاني عبد الرؤوف مطاوع
جمال الدين عبد المقصود أبو الحسن

هذه المسرحية عمل مغروس في تربة الواقع ،
شخصه أناس كالذين نعهدهم ونحن نضطرب
في غمار الحياة - بقوتهم وضعفهم، خيرهم
وشرهم - وهي عمل يملك من حس الفكاهة ومن
الفطنة إلى مفارقات الواقع ما ينأي به عن أن
يقدم دمي شمعية جامدة، ستاتيكية لا ديناميكية،
ترمي إلي فرض رأي بعينه علي المتلقي.



وزارة الثقافة



www.gocp.gov.eg
www.qatrelnada.com.eg
www.althaqafahalgadidah.com.eg
www.odabaalaqaleem.com



129 نصوص مسرحية

التمن: جنيهان

رسائل لم تكتب

دفاتر العشق والخوف

المؤلفان:

هاني عبد الرؤوف مطاوع

جمال الدين عبد المقصود أبو الحسن

تقديم:

ماهر شفيق فريد

وزارة الثقافة



سلسلة شهرية تنشر النصوص المسرحية الطويلة
لـ مختلف الأجيال وتعيى حركة النقد بدراسات نقدية

• هيئة التحرير •

رئيس التحرير
د. محمود نسيم
مدير التحرير
سعيد حجاج
سكرتير التحرير
محمد أبوشادي

الأراء الواردة في هذا الكتاب لا تعبر بالضرورة عن توجه الهيئة
بل تعبر عن رأى وتوجه المؤلف في المقام الأول.

• حقوق النشر والطباعة محفوظة للهيئة العامة لقصور الثقافة.
• يحظر إعادة النشر أو النسخ أو الاقتباس بأية صورة (لا بد أن
تكتبى من الهيئة العامة لقصور الثقافة، أو بالإشارة إلى المصدر).

هامة

نصوص مسرحية

تصدرها
الهيئة العامة لقصور الثقافة

رئيس مجلس الإدارة
سعد عبد الرحمن
أمين عام النشر
محمد أبو المجد
مدير إدارة النشر
صبيح موسى
الإشراف الفنى
د. خالد سرور

• رسائل لم تكتب
• هانى عبد الرؤوف مطاوع
• جمال الدين عبد القصور أبو الحسن
• الطبعة الأولى
• الهيئة العامة لقصور الثقافة
القاهرة - 2013 م
13 × 19,5 سم
• تصميم الغلاف: عماد عبد الفتى
• المراجعة اللغوية:
أشرف عبد الفتاح
• رقم الإيداع: 88474/2012
• الترتيب الدولى: 5-280-718-977-978
• للأرسلات،

باسم / مدير التحرير
على العنوان التالى: ١٦ شارع أمين
سامى - القصر المبنى
القاهرة - رقم بريدى 11561
ت، 27947891 (داخلى، 180)

• الطباعة والتشبيك
شركة الأمل للطباعة والنشر
ت، 23904096

رسائل لم تكتب

المقدمة

كتب هانى مطاوع وجمال عبد المقصود مسرحية رسائل لم تكتب بالتزامن مع أحداث حرب أكتوبر 1973 م، وتؤكد ذلك نسخة المسرحية التى حصل عليها الكاتبان من الرقابة على المصنفات الفنية وعليها ختم بتاريخ 5/12/1973 م، وذلك بعد أن كانت مفقودة لكليهما، وقد تم عرض المسرحية على خشبة مسرح الجمهورية فى مطالع عام 1974، فى عرض من إنتاج فرقة المسرح الحديث، ومن إخراج كمال يسين الذى أطلق على عرضه اسم (رحلة مع الحبايب)، وهو اسم لم يرحب به الكاتبان كثيرا، ورأيا فيه نزوعا للتجارية وذلك كما فهمته منهما

وتندرج هذه المسرحية عموما تحت باب ما جرى العرف على تسميته بـ «أدب الحرب» - فهى من ثمار نصر أكتوبر 1973م - ولكنها لأكثر من سبب، تملك ما يجعلها تتجاوز هذا الوصف وتعلو عليه.

فهى - فى المحل الأول - ليست من أدب المناسبات بمعناها الضيق، وإنما هى تعمّد - بلغة الفن - إلى تحويل الحدث الأنى إلى رمز باق، وتتوسل بالخاص إلى العام، وتسعى إلى تأكيد قيم إنسانية خالدة مما تلاقت عليه ضمائر الناس على اختلاف الأزمنة والأمكنة

وهى - ثانيا - بعيدة عن الجهارة الخطابية - كعب أخيل القاتل فى هذا النوع من الكتابة - لا ترمى إلى تهيج الخواطر واستثارة العواطف بشعارات رنانة وكلمات حماسية، وإنما هى تحاول الغوص على الجوهر الإنسانى الكامن فى أعماقنا جميعا وإن غطاه - أحيانا - تراب الأهواء، وغواية المصالح، وتضارب الرؤى، واختلاف الأيديولوجيات.

ثم هى - أخيرا - عمل مغروس فى تربة الواقع، شخوصه أناس كالذين تعهدهم ونحن نضطرب فى غمار الحياة - بقوتهم وضعفهم، خيرهم وشرهم - وهى عمل يملك من حسن الفكاكة ومن الفطنة إلى مفارقات الواقع ما ينأى به عن أن يقدم دى شمعية جامدة، ستاتيكية لا ديناميكية، ترمى إلى فرض رأى بعينه على المتلقى.

لهذه الأسباب - وغيرها - تستحق هذه المسرحية مكانا فى الـبريتوار المسرحى الباقى، جنبا إلى جنب مع أعمال لألفريد فرج

ومحمود دياب ويوسف إدريس وسعد الدين وهبة وسائر إخوان ذلك الطراز.

اختار هانى مطاوع وجمال عبد المقصود - وكلاهما رجل مسرح يحمل درجة الدكتوراه فى تخصصه ومثقف من طراز رفيع - أن يلتزما بوحدة المكان (التي لم ينص عليها أرسطو، وإن نسبها إليه شراحه التالون فى عصر النهضة الأوربي)

وذلك بأن جعلوا الحدث يدور كله فى حيز صغير، هو أتوبيس أقاليم يقل مجموعة من الركاب إلى القاهرة.

وساعدهما هذا المدار المغلق - بالمعنى الطيب للكلمة - على تحقيق درجة عالية من تكثيف الحدث وتقديمه فى حيز مضغوط مركز (هل نذكر هنا رواية الكاتب الأمريكى جون شتاينبك الأتوبيس الجانح أو مسرحية سعد الدين وهبة سكة السلامة؟)

ولا ينتقص من هذه الوحدة المكائنية - بل يزيد من تأثيرها ويكسر احتمالات الرتابة - ومضات ينتقل فيها الحدث إلى أماكن أخرى: جبهة القتال، مسكن الجندي، منزل صلاح وسميحة، بيت الميكانيكى، إلخ...

وتتعرض المنطقة التى يوجد فيها الأتوبيس لغارة من الطائرات الإسرائيلية تبرز أفضل ما فى روح هؤلاء الناس - كما تبرز نذالة الانتهازى وجبنه، وتدنو المسرحية من ختام وقد أصبح الأتوبيس على مشارف القاهرة.

وتتحقق وحدة الزمان بإدارة الحدث فى يوم واحد هو التاسع من أكتوبر - رابع أيام الحرب - حين كان الزخم الحربى والنفسى فى أوجه، وراية الانتصار تلوح فى الأفق بعد أن تمكنت قوات الجيش المصرى من عبور قناة السويس إلى الضفة الشرقية ورفعت العلم المصرى عليها بعد طول غياب.

فى هذا الكرونوتوب - المتصل الزمكاني بتعبير بأختين - تدور دراما حافلة بالصراع الداخلى والخارجى، متفجرة بالاحتمالات ومفتوحة على عدة إمكانات، أبطالها(بطولة الإنسان العادى لا بطولة شخصيات الملحمة الأسطورية أو أبطال الدراما الكلاسيكية والشكسبيرية الأعلى من الواقع) يمتدون عبر طيف بشرى واسع مختلف الألوان، متعدد الدرجات.

فهنالك - من النساء - أم بورسعيدية ابنها وخطيب ابنتها فى الجبهة، وابنتها زوجة ضابط تصطحب طفلها للإقامة عند أمها فترة الحرب، ومعيدة شابة انفصلت عن خطيبها الذى فضل الهجرة إلى كندا متخلياً عن وطنه فى وقت المحنة، وزوجة صعيدية، وهناك قبل كل هؤلاء - فلاحه يصفها المؤلفان بأنها مصرية بسيطة خفيفة الظل ابنها مجند على الجبهة.

أنها تقوم بدور الكورس المعلق على الأحداث. وهى - فى ظنى - أقوى شخصيات المسرحية كلها وأكثرها حيوية: تذكرنا

بفلاحات جزر أوران - فى غرب أيرلندا - اللواتى رسم لهن الشاعر
والكاتب المسرحى الأيرلندى سنچ صورا لا تنسى.

وهناك من الرجال جندى قطع إجازته وترك عروسه ثانى
يوم الزواج تلبية لنداء الواجب، وميكانيكى ابن بلد، وراكب فى
الخمسين على قسط من الثقافة والوعى، وصعيدى حار الدماء،
وسائق عجوز، وضابط شاب فى الجبهة، وابن الأم البورسعيدية
الذى يستشهد، وخطيب أخته، وابن الفلاحة الذى لا نراه ولكننا
نسمع أخباره منها، وخطيب المعيدة الراقبة فى الهجرة.

ومن آيات الصديق الفنى هنا إلا تكون الشخصيات كلها مثالية
وطنية مخلصة.

فهناك نموذج الانتهازى الذى يحمل معه شايًا وسكرا مهربا،
وهو الطرف المستفيد من الحرب المشكك فى قدرات أبناء وطنه.
والمساجلات اللفظية بينه وبين الفلاحة التى تدرك بفطرتها اعوجاجه
من أجمل اللمسات فى هذه المسرحية.

كذلك يتمثل الصديق الفنى فى مواقف من طراز نقاش المعيدة مع
خطيبها المصر على السفر، وبراعة الانتقال من غزل صلاح وسميحة
إلى شجارهما، وحديث الميكانيكى مع زوجته، وذروة الحدث -
حيث تدنو المسرحية من الجلال المأساوى - هى استشهد أحمد،
ابن الأم البورسعيدية، ووقع ذلك على أمه وأخته.

تبقى كلمة وجيزة عن بناء المسرحية ونسيجها:

أما عن الأول فالمسرحية تتألف من فصلين يتضمن كل منهما عددا من اللوحات. وقد يبدو للوهلة الأولى أن هذا يجعلها أقرب إلى النمو الخبرى episodic ، ولكنه فى الواقع - وهنا براعة مطاوع وعبد المقصود - بناء درامى هرمى يرتفع حجرا فوق حجر - حتى يصل إلى الذروة المأسوية.

ونسيج المسرحية غنى، لغته طليقة تترقق فيها عذوبة الروح المصرية وترتوى من تراث الفولكلور والأمثال الشعبية وحكمة الأجداد وتنوع اللهجات (انظر مثلا تميز لغة الصعيدى عن لغة الفلاحة عن لغة الميكانيكى). وهناك لمسات فكاهية من قبيل الخطأ فى استخدام اللغة malapropisms كأن يقول الميكانيكى: « على نفسها جنت مراكش »

ولن يغيب عن ملاحظة القارئ أو المتفرج هذه الروح الاجتماعية المصرية الأصيلة حين ينغمس الركاب - دون معرفة سابقة - فى محادثات عفوية من وحي اللحظة، قد تمس أخص خصوصياتهم، وهو ما لا يتصور فى أتوبيس إنجليزى أو ألمانى، مثلا، حيث كل راكب جالس فى حالة، لا شأن له بغيره، مقفل على عالمه الذاتى ومحصن ضد وجود الآخرين. بل هو قد يعتبر ابتزازهم إياه بالخطاب تقحما على خصوصيته وانتهاكا لرغبته فى الوحدة، فكانه

«مونداد ليبنتزية» مغلقة على الخارج، بلا أبواب ولا نوافذ، وجوهر لا يتحقق الا بذرته المنفصلة عن غيرها.

* اللوناده: كلمة يونانية معناها الوحدة استخدمها أفلاطون ثم أخذها عنه الفيلسوف الألماني ليبنتز بمعنى الجوهر الفرد البسيط الذي يمثل الوجود بأكمله، لا تقوم له قائمة ألا على شكل وحدة منفصلة عن غيرها.

لقد أنجبت الحروب أعمالا أدبية خالدة عبر القرون ابتداء بالياذة هوميروس ومرورا بأعمال لاسخولوس والمتنبى وشكسبير وبيرون وتولستوى وثاكرى وستندال وبراندو وأبولنير وبرخت وهمنجواى وشولوخوف.

وهذا النص - وإن كنا لا ندعى له ما ليس فيه - ثمرة ناضجة يسهم بها المسرح العربى فى هذا الموروث الجليل، ويخلد ذكرى عزيزة على كل مصرى ذاق مرارة الهزيمة فى 1967م ثم عرف حلاوة النصر فى 1973م، وذلك من منظور إنسانى رحب يطمح إلى مجاوزة اللحظة التاريخية المتعينة وملامسة ما هو ثابت وباق.

ماهر شفيق فريد

شخصيات النص

«المسرحية تدور فى أتوبيس أقاليم يقلُّ مجموعة من الركاب إلى القاهرة فى 9 أكتوبر/سابع أيام حرب أكتوبر...»

الأم البورسعيدية : أم بورسعيدية ابنها وخطيب ابنتها فى الجبهة..

منى : الابنة، ترافق أمها فى السفر وتعلم باستشهاد أخيها ولكن تخفى ذلك عن أمها.

سميحة : زوجة ضابط تصطحب طفليها نبيل ونورا للإقامة عند أمها فترة الحرب.
الفلاحة : فلاحه مصرية بسيطة خفيفة الظل ابنها مجند على الجبهة.

الجندي : جندي قطع إجازته وترك عروسه ثانى يوم الزواج تلبية لنداء الواجب.

- الميكانيكي: ابن بلد يترجم الأحداث بلغته الخاصة.
- بهجت: راكب فى الخمسين على درجة من الثقافة والوعى.. معتدل فى آرائه.. متقائل بالحرب.. وهو نسمة مطمئنة لأى قلق يساور أحداً من الركاب.
- المعبدة: معيدة شابة انفصلت عن خطيبها الذى فضل الهجرة سخطا على وضعه وهى ترى عكس رأيه.
- الانتهازي: راكب يحمل معه شايًا وسكرًا مهربًا وهو الطرف المستفيد من الحرب المشكك فى قدراتنا.
- الصعيدى: رجل من صعيد مصر بكل أصالته ودمه الساخن ذاهب للجبهة للانتقام ممن أصابوا ولده.
- الصعيدية: زوجته.
- السائق العجوز: رجل عجوز انقطعت صلته بالأحداث منذ بداية الخمسينات تقريباً.. «باقية ركاب العربية وهم يشكلون كورسًا فى الأغنيات»
- زوجة الجندي: " التى خلفها تنتظر عودته.

صلاح : ضابط شاب فى الجبهة - زوج سميحة.

أحمد : ابن الأم البورسعيدية.

عصام : خطيب منى.

محمد أبو جاد الله : ابن الفلاحة - جندى مدفعجى.

مدحت : شاب راغب فى الهجرة وخطيب

المعيدة السابقة.

تفيدة : زوجة بهجت.

أسرة الميكانيكى -

جنود

وشخصيات أخرى متفرقة..

الفصل الأول

اللوحة الأولى

”سيارة أقاليم تتجه إلى القاهرة في التاسع من أكتوبر...”

الأم بورسعيدية : لا.. احنا مش من مصر.. احنا من بورسعيد..

بورسعيدية..

الفلاحة : ونعم الناس أهلنا وحباينا.. ربنا ينصركم..

ما هو انتوا هاتتنصروا.. أيوه وحياة يمين

المصطفى هتتنصروا.. آمال هي سايبية.. مهما

حصل وكان الحق يعلى ولا يعلى عليه..

الأم : على رأيك كل حاجة بترجع لأصلها.. ربنا ما

بيرضأش بالظلم ده ربنا بيמתحن عبده..

الفلاحة : والنبي ياما ناس انظلمت وياما ناس افترت..

فكرك ربنا سابهم!؟ أبدا..

الأم : ما تقعدى هنا جنبنا يا ست.. هتفضلى واقفه

كده للآخر..

الفلاحة : كتر خيرك.. خليكي مستريحة زى ما انتى.. أنا

كنت هاقعد بس السواق يظهر مالوش غرض..

عايز يقعد الجماعة دول اكمنهم معاه فى الشركة..

- السائق : يا ست لا شركة ولا غيره.. ده أتوبيس بالحجز
وانتى ما كنتيش حاجزة..
- الفلاحة : هوه أنا يعنى ما دفعتش التذكرة.. مانا دفعت..
- السائق : دفعتى دلوقتى والكراسى كلها محجوزة وهتفضلى
واقفه طول السكة..
- الميكانيكى : تعالى يا ست اقعدى مكاتى.. تعالى..
- الفلاحة : لا خليك مستريح. ماتخافش ده أنا شديدة..
- ودابنى اللى أنا ولداه مايخشش من الباب ده.. وكيل
عريف قد الدنيا فى الجيش وليه شته ورنه..
- الميكانيكى : رينا يخلهولك.. بس اقعدى..
- السائق : ياخويا إيه الأدب اللى حط عليكم النهارده.. اللى
يقوم ويقعد التانى واللى...
- الفلاحة : أيوه قرإنت قر.. خلى الجدع يرجع فى كلامه
ويقومنى (يضحكون)
- بهجت : ياسلام لما الناس تحب بعض.. لما يبقى قلبنا على
قلب بعض نبقى أحسن شعب فى الدنيا.. دى
بلدنا حلوة.. حلوة أوى.. أنا سافرت ورحت وجيت..
وشفت ورجعت أقول مفيش أحسن مننا ولا فيه
دم أخف من دمنا ولا شهامة زى شهامتنا.. إحنا
اللى مش حاسين بنفسنا..

الميكانيكى : على النعمة يا بيه احنا اللي بدعنا المجدة والمرجلة
والمفهومية لامؤلخدة فى بلاد بره اللي ما بتعرفش
رينا قول بس أنا مصرى من الحمدى يقولك
بالخولجاتى كريس كريس.. ربنا يهيك..
(يضحكون)

سميحة : ويعدين بقى يا نبيل.. نورا.. (الأطفال يعبثون بأشياء
العجوز الجالس جوار الشباك).. أدي النضارة
للأستاذ عيب.. تعالى هنا يا نبيل.. بطل حرك
وفرك.. الواحد مش طايق روحه.. اقعدوا ساكتين
حبه بقه..

المعبدة : تعالى يا حبيبتي.. اقعدى جنبى..

سميحة : لادى شقية.. هتضايقك..

المعبدة : أبداً دى زى القمر.. (تذهب الطفلة للمعبدة

بمساعدة بهجت)

الفلاحة : إنتى رايحة فين يا شابة إنتى والقمرين دول..؟!

سميحة : هتقعد يومين فى مصر عند ستهم..

الفلاحة : آمال اسم الله على مقامك أبوهم فين..؟!

سميحة : أبوهم فى الجبهة.. ضابط مدفعية..

الفلاحة : مع محمد أبو جاد الله ابنى.. ما هو مدفعجى.. إنما

أيديه موزونه وزن.. ما يخشش من الباب ده.. ربنا
يحميهم.. يتكل على الله ويقوم لافح الطائرة جاييها لما
تكون فين أيديه موزونه قوى ولد يعجبك.. هاجوزه..
ما هو كبر خلاص عنده 19 سنة.. شوفى انتى بقى..
سميحة: ربنا يخليه.. ويرجعه لك بالسلامة..
الفلاحة: ده هو مبسوط من الجيش أوى.. ده بيوكلهم مكرونه
ولحمة كندوز وعدس وباسطينهم أوى.. كان عنده
بلهارسيا إنما خف وصحته جت ع الجيش.. بقى
عرض كده..
المعيدة: (لمنى) ممكن المجلة دقيقة ولحده..
منى: اتفضلى.. بس دى بتاعة الأسبوع اللى فات..
المعيدة: طب متشكرة.. إيه مالك سرحانه فى إيه..؟
منى: أبدا.. بس تعبانه شوية..
المعيدة: معايا اسبرين..
منى: متشكرة قوى.. يا ريتة كان يقدر يعمل حاجة..
المعيدة: إنتى تلميذة والا خلصتى.. شكك باين عليه صغير..
منى: يعنى.. خدت الثانوية العامة.. وحضرتك..؟
المعيدة: أنا معيدة فى الجامعة.. فى كلية الآداب.. انتوا من
بورسعيد (منى لا ترد) - (ساهمة) لا.. ده انتى مش
هنا خالص..

- منى :** انتى عارفه ماحدث من غير هموم.. (المعيدة تبسم)
- المعيدة :** وعازين ترجعوا بلدكم.. والا خلاص مستريحين هنا..
- منى :** صحيح مرتاحين، بس ماحدث يقدر يبعد عن بلده..
- المعيدة :** الدنيا دى غريبة.. المهاجرين عازين يرجعوا بلدهم..
- وناس يبقوا قاعدين فى بلدهم ويهاجروا منها..
- منى :** قصدك إيه..؟!
- المعيدة :** خطيبى..
- منى :** خطيبك..!! مش قلتك ماحدث عايش من غير هموم.. (ابتسامة)
- الأم :** ما تقرى لنا يا منى جواب عصام..
- منى :** (فى ألم تحاول إخفاءه) إيه الحكاية يا ماما.. ده أنا قريته أربع مرات.. عايزه تعرفى إيه وأنا أقولك.. هو فى كتبية وأحمد فى كتبية..
- الأم :** طب وأحمد ما كتبش ليه.. إذا كان عصام الغريب كتب..
- منى :** عصام ما بقاش غريب يا ماما.. خطيب بنتك ما بيقاش غريب.. وأحمد ماحدث عارف ظروفه..
- الأم :** أهى ظروفه دى اللى أنا خايفه منها.. أحمد ما ينسانيش أبداً ما يحشوش عنى إلا الشديد القوى.. أنا قلبى مقبوض

كده ويا منى أنا مش عارفه إيه لزمة مرواحنا
 لخالك.. ماكان عندنا الأسبوع اللي فات.. إنما إنتى
 اللي راسك وألف سيف لازم نروح مصر.. طيب
 أدينا رايعين مصر.. هنعمل إيه..!؟
 منى: (تبكى ثم تحول وجهها ناحية الشباك حتى لا تلحظ
 الأم شيئاً)
 الميكانيكى: يا خرابى يا جدعان.. ده قاله خدقين يوجعك.. قال
 له إيه قاله أه.. قال طب.. تعالى كدى دوغرى..
 والطريجة التمام ما اتفاهمش.. بتعمل إيه فى بلدنا
 بتتفسح.. وخده فسحه..
 سميحة: يا جماعة مفيش حاجة جديدة..
 بهجت: آخر بيان.. خمستاشر.. والحمد لله قواتنا ماشيه
 عال.. وبالعقل وحاجة تشرف أوى..
 الميكانيكى: (ملاحظا اضطراب سميحة) اطمئنى أوى
 ماشيين زى الحلاوة..
 بهجت: الحالة مطمئنة يا ست..
 الأم: امتى يبجى اليوم اللي اركب فيه عربية زى دى على
 بورسعيد ومعايا انتى وأحمد وعصام.. نمشى فى
 أحلى طريق.. طريق حافظناه.. ياما عديته..

وأنا بنت.. وأنا عروسة جديدة.. وأنا شايلة أحمد على
دراعى وهو لسه عيل.. أمتى نمشى فى شارعنا تانى..
نخط على باب بيتنا تانى..

الميكانيكى : بيقولك قوتنا المسلحة ماجتش فى الكتب.. الكنال دى
عديناها فى 3 دقائق.. انصب الكبارى.. عدى..
اترعبوا.. دلحنا عندنا عيال حلوه أوى.. جديعان زى
اللورد.. ولاد بلد دمهم حر.. أديهم سلاح وانفرج
عليهم.. أديهم كنابل.. وخذ منهم شغل..
الفلاحه : الا ما فتحت بكك بكلمة.. مالك يا ضنايا ساكت
كده ليه..

الانتهازى : قبضنا إيه من الكلام.. اتكلمنا قبضنا إيه..!؟

الفلاحه : عاقل يا ابنى.. قلبك.. فى الله إنت فيه.. بكره ربنا
ينصرنا والحرب تخلص..

الانتهازى : والله تخلص ما تخلص هى وظروفها بقه.. وماحدث
عارف الخير فىن..

الفلاحه : لا جدع قلبك جامد برضه..

الانتهازى : لا ما تخافيش بس على مهلك على الشوال اللى إنتى
قاعدة عليه ما تريحيش عليه أوى.. وما تخريش فيه
صوابك ده مال ناس..

الفلاحة : يوه يا ابنى.. هو أنا جيت ناحيته..
الانتهازي : آمال أمى.. ومأ تخرييش فيه بصباك وحياة
والدك، ده مال ناس..
الفلاحة : طب روح كده بالشوال بتاعك.. وانت عامل زى
ذكر البط المزغط كده..

(يسمع من الراديو الموسيقى التى تصاحب البيانات العسكرية..
يبدأ الكل فى الاصغاء.. وتسمع تعليقات من نوع بس يا جماعة
خلينا نسمع.. إنشاء الله خير.. بس يا نورا انتى ونديل خلونا نسمع
المهم تفضى اللحظة إلى سكوت تام فى الأتوبيس)

(تبدأ إذاعة البيان رقم / 16 الذى يعلن رفع العلم على القنطرة
شرق والخسائر الفادحة للملحقة بالعدو وفرح أهالى مدينة القنطرة
وانتظار أن تباشر محافظة سيناء عملها)

(بعد البيان تبدأ مجموعات الشباب فى العربية تغنى فرحة مع
صياحات الإعجاب والتكبير ومع خفوت الصوت يبدأ الحديث)

الميكانيكى : بيقولك محافظ سيناء هيستلم..

- الفلاحة : لهى واثت جاهى ينصركم نصرة قوية..
- الأم : ربنا ياخذ بيدكم ويرجعكم مجبورين الخاطر..
- نورا : بابا معاهم يا ماما..
- سميحة : (فى قلق) أيوه يا حبيبتي..
- الفلاحة : (تسأل بهجت بسؤال خفيض) إنما قوللى يا خويا..
- فيه ناس بتموت فى الشغله دى..
- بهجت : طبعاً يا ستى.. مش حرب..!!
- الفلاحة : ومن حدانا كمان..
- الانتهازي : الواحد إيده على قلبه، خايف لتكون الخساير
- عندنا كبيرة برضه..
- الفلاحة : يا باى.. إيه الفال الوحش ده..
- بهجت : لا يا حضرة الكلام ده مش مضبوط.. المرة دى ما
- بنخبيش حاجة.. بس لازم نقدر إن دى حرب وعشان
- نكسبها فى الآخر لازم برضه يبقى عندنا خساير.. بس
- تأكدى إن خسايرنا سواء فى الأرواح أو أى حاجة تانية
- ما تجيش حاجة جنب خسايرهم..
- الفلاحة : الله يطمنك يا خويا.. (وتبكى)
- الانتهازي : ربنا يستر بقى أدينا بنتكلم، عارفين إيه اللى ييجرى،
- بيقول لك الجبهة عبارة عن نار جهنم..

- الميكانيكى : الله بتعيطى ليه يا أمى..
- الفلاحة : يكون محمد ابنى انصاب.. ده ماشيعش ولا
جواب لحد دلوقت..
- الميكانيكى : وانت إتش عرفك..؟
- الفلاحة : ما هو اللى ميجيش منه الخير أبداً دهه قاللى
(تشير إلى الانتهازى الذى تبدو عليه الدهشة
ويضرب كف بكف)
- الميكانيكى : ما تحطيش فى بالك.. ولا جراه حاجة.. انتى ما
سمعتيش الراديو ده يمكن هو اللى رفع العلم..
(بابتسامه) والنبي ١٩ من بقك لباب السما..
- الأم البورسعيدية : يا منى.. إنتى مش عايزه تقرلى الجواب ليه..
يا ماما ده إنتى حفظتية..
- الأم : بس ده ماجابش سيرة أحمد أخوكى خالص..
- منى : علشان عصام فى مكان وأحمد فى مكان..
- الأم : ازاي يا بنتى دول مع بعض..
- منى : هما صحيح تجنيد واحد إنما أحمد فى حته
وعصام فى حته..
- منى : طيب يا بنتى ربنا يطمنك..
- الميكانيكى : جرى إيه يا جماعة انتوا قلقانين ليه.. ولا يكون

عندكوا فكر.. اسرائيل تعبانه قوى.. وعايظه الحرب
تقف.. ولحد كبير أوى قال لى كده.. هى ما
تستحملش الحكاية تطول.. وأهو على نفسها
جنت مراکش.. هما اللي جابوه لروحهم.. حاكم
الجاهل عدو نفسه.. قالك حرب.. قاله طب خد..
والا إيه يا دفعه..

الدفعه :

إذا كانت الحكاية بالدراع فاحنا قدها وقود..

الفلاحه :

الله ده بيتكلم.. بسم الله الرحمن الرحيم.. (بيتسم لها

الجندي فتبتسم له) أيوه كده سمعنا كلامك الطو..

الميكانيكى :

(ملتفتاً للصعيدى فى آخر العربيه) إيه يا والدى

إنت مش معانا والا إيه ده لحنا حاربنا وعدينا ولا

مبلغوكوش..

الصعيدى :

أهو تار بايت والزمان طويل واللى رشك بالميه رشه

بالدم بيقولوا حدانا النار ولا العار..

الميكانيكى :

اللهم صلى على النبى أهو كده الشغل.. وبالك هما

حايروحو منا فين.. لحنا المرة دى متان أوى..

صعايده.. مش كده يا أبويا..

الصعيدى :

(بحسم) الحصان الهادى منتوف ديله..

(—————)

اللوحة الثانية

”صوت الأوتوبيس وهو يخترق الطريق“

(الجندي يبدو عليه القلق الشديد والفلاحة تلاحظ ذلك)

- الفلاحة : ياخويا مالك مش على بعضك كده.. عمال تحرك
وتفرك.. مستعجل على إيه.. ماعدوا خلاص.. والا
إنت يعني اللي هتسوى الهوايل..
- الجندي : أصلى لسه هاركب القطر الحربي من مصر.. على
الله أوصل بدرى..
- الميكانيكى : ماتاخذش كلامها جد يعنى بتضحك معاك
وزى والدتك
- الفلاحة : ولما أنت شاطر كده كنت فين من الأول..
- الجندي : ماهى ظروف بقى..
- الفلاحة : يعنى مات لك العزيز الغالى ياخى..
- الميكانيكى : حيلك ع الدفعة شوية يا أمى..
- بهجت : يا ستى مش لازم الكل يبقى على الجبهة.. جيشنا

لازم يكون فى كل حته.. المهم إن كل واحد يعمل
الى عليه..

الفلاحة : لهو محمد يروح هناك والدفة ما يروحش؟ (الجندى)

هو إنت مابتروحش الكنال.. لهو إنت مش فى للدفة..؟

الجندى : رايح إن شاء الله.. بس أنا فى المدرعات..

الفلاحة : حلوة برضه.. وأهو إنت ومحمد تشيلو بعض..

الجندى : محمد ؟ محمد مين يا خاله..؟

الفلاحة : محمد أبو جاد الله ابنى — ما أنت هاتلاقه هناك..

ماهو معاك فى الجيش..

الجندى : ابنك فى الجيش..

الفلاحة : أبوى أمال عايزنى أقعده جنبى.. القعدة للبنات.. ابنى

نقوه من وسط ميه وحاكم رقوه عملوه عريف مدفعية

بشريطين فى عين العدو.. ما هو أصله طالع لسيدة

الله يرحمه.. ماهو برضه كان فى الجيش.. كان

نضورجى.. روخر إيه.. مات عنده كتير.. (90) سنة إنما

عينه تجيب لحد البر دكهه.. محمد ده برضه نشنجدى

أوى.. بيتمرن على الفتوم وكتاب الله..

الجندى : ربنا يوفقه ويرجعه بالسلامة..

الفلاحة : والنبي أنا ظلمتك.. إنت باين عليك جدع ابن حلال

وطيب.. ما هو محمد طيب أوى برضه.. ما يفتحش
عينه فى أبدا.. ما يعليش صوته على.. بس بقى دى
حاجة واللى ما يتسموش حاجة.. إن ماكانش عينيه
وسع كده.. يروح فى شوية ميه..

الجندي : ماتخافيش يا خاله.. النبوة دى احنا صاحبين لهم
أوى..

الفلاحة : والنبي كلامك كلام محمد أبو جاد الله ابني.. ما هو
شبهك كده والنبي وطولك تمام.. انتو شكل بعض
كده ليه ؟!.. هه بص لى هنا إنت سرحت فى إيه..؟!
أبدا..

الفلاحة : هيقول لى أبدا.. ما هو محمد أبو جاد الله ابني كده
برضه.. يبقى فيه الى فيه واسأله يقول لى أبدا.. هى
أبدا دى اللى بتخلينى اعرف إن فيه حاجة.. (يبتسم)
أقول لك ما تيجى تكتب لى كلمتين لمحمد أبو جاد الله
أخوك.. (للانتهازي) ما توعى ياخويا كده توسع
للجدع.. بدل ما انت قاعد من الصبح تحسب فى
النوطة.. ولا اللى بيعسب فى مالية الوزارة..

الانتهازي : يا فتاح يا عليم.. إنتى يا ست بتقولى يا خناق..

الجندي : خليه مستريح أنا مستريح هنا (للفلاحة) معاكى
نمرة وحدته..

- الفلاحة :** إنت برضه اللى بتسأل .. بدل ما تقول لى يا خويا
اكتب كده بلاش بتاع ..
- الجندي :** يعنى اكتب جواب ما يوصلوش ..
- بهجت :** (غامزًا للجندي) لا يوصل .. بس ما تكتبوش كتير ..
- الميكانيكى :** اكتب يا سيدى هى فى حاجة ما بتوصلش ..
- الفلاحة :** قول له .. إنت مستكتر يعنى تروح تديهوله فى
إيده ..
- الجندي :** هو أنا اقدر أقابله ..
- الفلاحة :** إيه .. اللى يسأل ما يتوهش والف مين يدلك .. ولا
انت اللى ماللكش غرض ..
- الجندي :** (مستسلمًا) حد معاه ورقة ..؟
- المعبدة :** تنفع دى ..؟
- الجندي :** مالها كده مقطوعة ..
- الفلاحة :** طلع لى بقى فيها القطط الفطسه .. هى الورقة
متعصى .. والا إنت اللى عايز تسدها بأى طريقة ..
- الجندي :** اقله إيه ..؟
- الفلاحة :** اكتب فوق كده باسم الله الرحمن الرحيم — وبعدين ..
بوسه لى من هنا ومن هنا .. وقول له أمك بتسلم
عليك .. صحتها بقت عال العال .. رجلها خفت ورايحة

مصر تدعى له فى أم هاشم.. وقوله أنا زعلت مع
نبوية اوعى تكلمها يا محمد.. تصور يا محمد..
تقوللى إنتى مركبة فى رجليكى بابور.. عايزه
تكسحنى يا محمد.. عايزه تكسح أمك.. (تنظر
للجندى الذى سرح) إنت سرحت برضه وما
كتبتش حاجة..

(ترتفع الموسيقى ويظهر فى ركن من أركان المسرح فلاحه تحمل
صينية أكل وتخطب شخصاً لا وجود له وهى زوجة الجندى وعلى
المخرج أن يوهم المتفرج بوجود الجندى فى المكانين إذ إن اللحظة
نوع من التداعى حيث يتذكر الجندى فى ومضات خاطفة لحظات
قضاها مع زوجته التى لم يدم على عرسهما أيام)....

زوجة الجندى : أدي يا سيدى الرز أبو سكر عمايل إيدى.. كل
وقوللى.. إيه رأيك — كل وماتحملش هم.. والصبح
تسافر بالسلامة، وماتخافش عليه.. يمكن أقعد
أناوسيدة لختى بس واروح أُمى.. مالهاش لزمه
معايا وعشان هما ما بيسستغفوش عنها فى
البيت.. وبينى وبينك أبويا ما يطيقش غيابها أبداً..

وأنا ما ارضاش أزعله.. قعدنا مع بعض أيام.
 على رأى أمى.. عروسة بقالى ثلاث أيام
 وعريسها فايبتها ورايح الحرب.. بس ربنا يعلم
 فى القلب إيه من ناحيتك.. عمرى ما أنسى
 حنيتك على أبداً ولا لسانك الحلو.. هاستناك
 يا حسن وعارفه إنك يمكن تغيب شوية بس
 هتيجى تلاقى اللى مستنياك تلاقى اللى
 هتخدمك بعنيها.. ربنا يكتب لك فى كل خطوة
 سلامة ويديلك على قد نيتك ويحوش عنك
 الشر ويرجعك منصور بإذن الله..

(يضاء ركن آخر فى المسرح على جبهة القتال.. مجموعة جنود)

محمد أبو جاد الله : ما تيجى أمليك كلمتين كده يا خليل.. مندوب
 البريد نازل وأمى زمانها مشغولة على أوى..
 وأهى فرصة اكتب لها كلمتين اطمئنها..
 وده وقته برضه يا محمد.. رايقين قوى ومش
 ناقص إلا الجوابات (يدخل ضابط شاب)
 إجهز أنت وهو.. هنحتل الموقع بعد عشر
 دقائق..
 خليل :
 الضابط :

خليل : تمام يافندى..
الضابط : إيه اللي فى إيدك ده يا محمد..؟
محمد : جواب لوالدتى يا افندم..
الضابط : طب بسرعة عشان ماقدمناش وقت..
محمد : حاضر يا افندم.. بلاش بقى أحسن أنا خطى
عاجز شوية ومش وقته بقه..

(نقله على الفلاحة.. بعد ذلك المفروض أن يعدل المخرج هذه
الثلث مناطق.. الأوتوبيس وجبهة القتال ومسكن الجندي فى
ضفيرة بوقعه على نحو موسيقى يتسم بشيء من الشاعرية رغم
طابع الدعاية للسيطرة إلى جد ما على اللحظة)

الفلاحة : بص يمين وشمال وفتح عينيك كويس يا محمد..
إوعى عينك تغفل حاكم اليهودى غدار وحش..
ما يتأملوش إذا قدر ما يعفیش..
زوجة الجندي : خالى بالك كويس يا حسن وفتح عينيك وسمى دول
ما يعرفوش ربنا.. مفيش فى قلوبهم رحمة..
الفلاحة : وكل كويس يا محمد عشان تصلب طولك.. الواحد
إن ما ملاش بطنه ما يعرفش يعمل حاجة.. خالتك

زنوبة بتسلم عليك هي وخالك سيد ومراته..
والبنت زكية بنت خالك الباكسه قلقانه عليك
أوى.. وأنا مش عارفه إيه الحكاية بقى يا
محمد..!

محمد أبو جاد الله : اتكنى يا أمه وبطلى عط حاكم عارفك ولخده
السكه قياسه من خالاتى لعماتى لسلايفك..
وتلاقيكى لسه راجعة من عند خالى وزكية
أزيها.. ما أنا نويت خلاص، وهى برضه مش
غريبة وهتريحك فى الدار..

الفلاحة : مرأة عمك قاعدة مع ابنها فى مصر عقبال
أملتك بقه بعد ملخد الشهادة اتجوز واحدة من
مصر.. بندرية.. وأنا هاقعد عندهم لغاية ما
أزور مقام أم هاشم وارجع..

محمد : اقعدى فى بيتك لحسن بعد الشر تنصابى يا
أمه.. خدى بالك من الأرض.. أنا عارف إن
البركة فى خالى إسماعيل وكل حاجة لكن
نفسك هيخلى قنطار القطن قنطارين.. وأنا
عشمى كبير فى الزرعة السنة دى..
وأصلها سنة مبروكة..

زوجة الجندي : لف نفسك بالليل كويس بالبطانية الدنيا بتسقع .. أنا

عارفاك ما بتطيقش الغطا تزقه برجليك توقعه من

ع السرير ..

الفلاحة : يا خويا إنت بتكتب كلمة وتأخذ لك تعسيله .. إنت

باين عليك مابتعرفش تكتب .. طب آخر حاجة

كتبتةا إيه ..؟

(الجندي يذكر كلمات زوجته)

الجندي : لف نفسك بالليل كويس بالبطانية الدنيا بتسقع .. أنا

عارفاك ما بتطيقش الغطا تزقه برجليك توقعه من

على السرير ..

الفلاحة : (بعد لحظة من تأمل الكلمات) لهو أنا قلت لك كده ؟!

.. طب كويس وزود .. لأحسن تدب الغطا برجليك

توقعه من ع الحصيرة تأخذ رطوبة ومناخيرك

تصبح ساييه وتقع طول النهار تشن ..

محمّد : مش الواك زنا تي خد طلقة في دراعه .. بس كويس

ابقى طمنى أمه عليه .. طول عمره تعلب .. نط على

اليهود في خندق وهو ماسك عليه بولوييف على

أنها قنبلة .. اليهود خافت وطلعوا قدامه مرفعين

أيديهم .. وواحد كان مستخبي طلق عليه رصاصة ..

بس زناتى مسابوش عكمه من رقبته وجابه.. يا أمه
 الجدعان هنا عامله زى ما تكون رجالة بتطفى حريقة فى
 دار جدع ابن حلال.. زى ما تكون بتطلع جاموسة
 واقعة فى الساقية ماحدش بيتأخر.. ماحدش همه إن
 البارود يصيبه.. العلم وهو مرفوع البر دكهه وقفنا
 حواليه نرقص ونتنطط من الفرحة والرصاص بيصفر
 فى ودانا من كل ناحية ولا على بالننا.. جدع دفعه راح
 مسك علم إسرائيل وتنه يقطع فيه بإيديه وأسنانه ويعيط
 ويبوس التراب.. يا أمه الشمس بتبقى فى عز الظهر
 ولا فيش لا جميزة ولا أى سجرة الواحد يتدارى فيها..
 الا وتلاقى طراوة إيه وضله إيه.. الرجاله اللى ماشيه
 شايلة السلاح كأنها موكب لافف البلد بعفش عروسة
 جديدة والزغاريد وطلق البارود وليالى الحنة وعريس
 يحلوه لخواته وحبايه..

(يبدل جندى على الضابط ومحمد أبو جاد الله)

الجندى : سيادة المقدم بيقول لسيادتك تجهز يا أفندم..

الضابط : يالله يا محمد..

محمد : والسلام ختام يا أمى..

(يبدأ تحرك الجنود مع الموسيقى وفى نفس الوقت يتصاعد
إيقاع الأداء التمثيلي لباقي المشهد)

الفلاحة : وطول النهار بادعيك ربنا ينصرك على العدوين..
زوجة المجندى : إن شاء الله لما ترجع بالسلامة.. عايزين نقعد يومين
فى البلد حدانا.. ده أمى بتعزك أوى..
الفلاحة : الله يكرمه واحد من اخواتك قاعد بيكتب لى الجواب..
طولك كده وقدك.. بس يا حبة عينى قلبه مشغول
وبيسرح مش عارفه فى إيه.. وهو اللي هيديك
الجواب.. ابقى اكرمه يا محمد.. اكرم أخوك..
«تلتفت إليه» إنت ما قتلتيش يا جدع اسمك إيه..؟!

(ترتفع الموسيقى مع الكلام)

اللوحة الثالثة

(مع إضاءة المسرح على الأتوبيس الكل مصغٍ إلى البيان 17)

صوت الراديو: بدأ العدو يقصف مدينة بورسعيد ودمر عددًا من
المساكن والمباني، وأشعل بها الحرائق، مما كبد
الأهالي المدنيين بعض الخسائر، وعلى ذلك تعتبر
هذه أول مرة تضرب فيها مدينة جمهورية مصر
العربية، وعلى العدو أن يتحمل نتائج هذه العملية..

(تعلو الهمهمات وتدل على آلام منى... تحتضن الأم.. ترتفع
أصوات انفجار قنابل وأزيز طائرات تختلط بموسيقى شعبية
بورشيدية، ونسترجع مع الأم وابنتها ذكرى حديثه تتسم في
منزل الأسرة في المهجر بعد أحداث 1967 وقبيل نشوب حرب 6
أكتوبر بأيام.. المنظر صالة في منزل أسرة متوسطة، نرى فيها أحمد
وعصام وهما شابان في العشرينات بينما الأم وهى فى الخمسين
تقوم بعمل القهوة.)

أحمد : طب إنت فاكرك الراجل اللي اتخافك معانا فى المينا أبو البنات
البيضة دى أم صغيرة طويلة ..

عصام : أيوه فاكركها ، وأبوها الراجل الحمقى ده اللي ماحدش
كان عارف يسكته ..

أحمد : أيوه شفته هو وبنته دلوقت فى الشارع ، لقيته فى
وشى ، تفتكر عملت إيه .. ١٩

عصام : ولا حاجة تلاقيه نسي ..

أحمد : لا مانسش ، تصور ضحك لى هو وبنته .. طبعاً مش
حتصدق تصور يا عصام لو شفته تقول مش هو .. بقى
رفع كده والبنات النور اللي فى وشها راح ، زى ما تكون
لمبة انطقت على أوى .. قاعد عند أخته ..

عصام : واداك عنوانه وقال لك لازم تيجى له وتقعدها تتكلموا
عن بورسعيد ..

أحمد : ده أنت زى ما تكون عارف ..

عصام : طب ماتقول لك حاجة .. افكر كده واحد بينى وبينه
مصانع الحداد ..

أحمد : لأ بقى ما تسرحش بى .. إنت كويس مع الكل ومفيش
حد مش صاحبك ..

عصام : لا افكر كويس ، وإنت ما بتحبوش ويتقول لى عليه
رخم وما بينزل لكش من زور ..

- أحمد : غلب غلبى، مين..؟
- عصام : مدحت عبد الباقي بتاع الزراعة..
- أحمد : يا باى ما تقابلش غير مدحت..
- عصام : كان ماشى فى الشارع لوحده، فى وسط الزحمة لمحته
وماحسيتش أنا عملت إيه إلا الآخر، لقتنى باصرخ بطلو
حسى «مدحت» اتلفت حواليه، ما كانش شايفنى.. قربنا
من بعض وقمنا حاضنين بعض كانى لقيت لقيه..
- أحمد : وأنا لما شفتم فرحت..
- عصام : استغربت ليه كنت بعيد عن مدحت استغربت ليه..
- كنت فاكر إن شكله وحش.. وعرفت إنى باحبه..
- أحمد : عشان من بلدنا..
- عصام : عرفت وقتها أنا باحب بورسعيد قد إيه، ماكنتش فاكر
إنى باحبها بالشكل ده أبداً..
- أحمد : نفسى أشوف بورسعيد يا عصام، تفتكر حانشوفها
تانى..
- عصام : أما سؤال سخيف صحيح..
- أحمد : عندك حق سؤال سخيف.. إن ما رجعتش، تعرف يا
عصام أنا بيتهياكى إن إحنا عاملين زى السمك الللى
بنصطاده إن طلعلنا بره الميه نموت..

عصام : بورسعيد حلوة يا أحمد، بلدنا نضيقة وبتبرق، واللى أنا
مستغرب له إنى ما كنتش حاسس بجمالها ده.. زى اللى
كان متجوز واحدة وطول النهار يتخانق معاها ويعدين
سابها واتجوزت واحد تانى.. لما شافها معاها حلوة زى
القمر..

أحمد : نفسى اسهر سهرة طويلة فى بورسعيد لحد الفجر، ألف
البلد حته حته، أجيبها من أولها لأخرها، واقعد على
الكورنيش افتح صدرى لهوا البحر ولخلى الهوا يعدى
على خدى ورقبتى هادى.. بارد.. ريحة البحر ما
بتفارقنيش، ليها حق أمى تعبى، ليها حق.. (يبتسم)
عصام : بتضحك ليه..

أحمد : فى الشركة عندنا جالنا عامل كان بيشتغل فى مطبعة
وانتقل عندنا عيى.. كان بيجيله ضيق تنفس.. الدكاترة
قالوا حساسية وغلّبوا معاها والآخر دكتور عرف علاجه
عرف إنه كان بيشتغل فى مطبعة ومن هنا جت له فكرة
شممه قطنه بحبر طباعة.. ارتاح، أما كانت تيجى له الأزمة
كان يفتح الدرج عنده ويشم القطنه، إحنا بقى اتشبعنا
بجو بلدنا .. جو حلو.. جو مفتوح - جو البحر..
(الأم تقدم لهما القهوة)

- الأم : محموقين قوى كده ليه..!٩٠
- أحمد : أبداً، بنتكلم عن بورسعيد..
- الأم : بورسعيد (تقف برهة صامته ثم تبسم)
- عصام : إيه يا طنط بتضحكى ليه..!٩٠
- الأم : أبداً.. افكرت حاجة بمناسبة بورسعيد..
- عصام : والنبي تقوليها يا طنط..
- الأم : (فى نشوة) أحمد كان صغير ماكانش لسه دخل بالمدرسة
بعته يجيب رطل قوطه عشان أطبخ، واديته قرش غاب
غاب والأخر جه وندده على من تحت مسك القرش فى إيدده
وقال لى يا أم أحمد نجيش نجيب قصب.. (يضحكون)،
وانتوا يا عصام بيتكم جرى له حاجة..!٩٠
- عصام : جرى له اللي ما جراش لحد..
- الأم : المدافع بهدلتته..
- عصام : أيوه اتهد خالص..
- الأم : يعنى هيتبنى من أول وجديد.. احنا بيتنا هيترمم (تدخل
منى - وهى فتاة فى التاسعة عشر - الابنة التى رأيناها
قبلاً فى الأتوبيس)
- منى : يا ماما دى الشبابيك والبيبان كلها بقت فحم..
- الأم : إن كان على الخشب يتركب..

منى : إنتى عارفه شكل البلكونه بقى عامل ازاي، إنتى عارفه

السقف ده مفيش سقف خالص..

الأم : يا بنتى السقف يتبنى..

منى : ده الحيطان طوبها بقى اسود زى حيطان الأفران بالضبط..

الأم : إنتى إيش عرفك بس يا منى.. البيت هو يتوضب.. يبقى زى

الأول والبلكونه تبقى زى ما كانت.. أبوكى الله يرحمه كان

يقعد فيها يقرأ الجرنال كانت تحدف هوا.. تحطى القلل فيها

ميتها تبقى زى السكر..

منى : أصلها بحرى..

الأم : (لأحمد وعصام) منى اتولدت فيه، الليه كانت مقطوعة ولما

منى اتولدت لليه جت.. أم سيدنا اللى تحتنا زغرطت بعلو

حسها من تحت وقالت يا وش الهنا يا منى الله يصحبها

بالخير.. حسها كان بيحب لآخر الشارع..

منى : صحيح هى فى.. بقالنا كتير ماشفناها..

الأم : ودوهم المنزل ودلوقت صحتها ما بقتش مساعداه.. الأول

كانت قوية ياما شالتك على كتفها ونزلت بيكى تحت..

كانت أيام حلوة يالله هى أيام بنقضيه..

منى : إنتى اللى بتقولى كده.. أولاً إنتى صغيرة.. إنتى عندك 32

سنة (الأم تضحك.. منى تتذكر شيئاً) الدوا ماخدتيش

الأقراص متاخدي قرصين هتنامي وتبقى عال..

الأم: أنا مش هارتاح إلا لما تريحي عصام ده أنتم مكتوب

كتايكو واديني قايمه أهه عشان تعرفوا تتكلموا..

أحمد: طب خديني معاكي عشان أغير هدومي... عن إذنكم..

عصام: إتفضل يا أحمد..

(تنهض الأم وأحمد وينصرفان تاركين منى وعصام)

عصام: لو أطول أجيب لك حبوب الفرششة اللي بيقلوا

عليها دى..

منى: ولا حبوب الدنيا بحالها..

عصام: على اللي شايفه منك اليومين دول أنا معاكي، دى

الحبوب دى حتى يمكن تقلب معاكي بعياط (منى تحاول

أن تكتم ضحكة) شوفى مش عايزة تطلعى الضحكة، يا

ساتر بتدوسى عليها باسناتك صحيح الواحد لما يكشر

يبقى شكله وحش..

منى: معلش أنا عايزه يبقى شكلى وحش عملت إيه

بحلاوتى..

عصام: يبقى أنا مش عارف اضحكك، يبقى أنا دلوقت

مش عارف أضحك قطة..

منى: تفتكر يعنى أنا غاوية نكد..

عصام : افتكّر ؟ ده أنا متأكد عارفه أنا لو كنت عارف إنك

بالشكل ده كنت خلعت من الأول ..

منى : (ضاحكة) بقى كده ..؟

عصام : أول ما خطبتك كنتى بتضحكى وأنا ولخدتك على كده

يعنى غشيتونى ..

منى : إنت فكرك الزعل والفرح ده ليه زراير ، أدوس على زراير

ازعل أدوس على زرار اضحك ..

عصام : لا ده احنا بقينا نتكلم كلام كبير ..

منى : الدكتور بيقول لماما ما تزعليش عشان الضغط ما

يرتفعش ، وماما دايماً زعلانه .. تفتكر هى بمزاجها عايزه

الضغط يرتفع ..

عصام : طيب عند على عند أنا هافرحك النهارده ..

منى : افرحك ؟ والله كويس إنك لسه فاكّر الكلمة دى أنا

نسيتها من زمان ..

عصام : متعرفى دلوقت هافرحك والا ، يوم الجمعة حانروح

دمياط نتفرج على خشب ، بيعملوا هناك أود حلوة

قوى ..

منى : وبعدين ..؟

عصام : الله ، إيه تقل الدم ده ..

منى : عصام أنا خايفه أكون ظالمك معايا ..

عصام : يعنى إيه مش فاهم...؟

منى : مش عارفه أقول لك إيه ..

عصام : أكيد فيه حاجة حصلت ومش عايزه تقوليها ، كل مرة باقعد معاكى فيها ارجع البيت افكر فى كل كلمة قلتها القانى ما قلتش حاجة غلط ، افكر فى كلامك للقاكى مش حاسه بى خالص ..

منى : وتفكر أنا حاسه بنفسى ..

عصام : اعرف السبب يا منى ، ده أنا خطيبك ..

منى : وأنا عندى 8 سنين رحنا رحلة تبع المدرسة ، الظهر جه مارضيتش أكل ، المغرب جه الأبله قالت لى لازم تاكلى .. كان متهيالى إنى بعيدة أوى عن بيتنا وكنت عايزه أروح وكنت باعيط من ورا الأبله مانسيتهاش لما كلت استغربت .. عرفت حاجة مانسيتهاش لغاية دلوقت .. كان جنبه رومى قديمة وعيش فينو .. الجبنة الرومى والعيش الفينو وقتها كانوا فاكهة عندنا ..

الى استغربت له إن الجبنة وكنت باكلها حاف وما كان لهاش أى طعم .. إنت نفسك ماكنتش ترضى تبات عندنا فى بورسعيد لما كنت تتأخر بالليل ليه...؟

عصام : إن غيرت نومى ما اعرفش أنا..

منى : أهو إنت دلوقت مغير نومتك وجيرانك وبلدك (عصام
يحتضن منى فى صمت) (يطرق الباب يظهر أحمد
الذى يفتح الباب ثم يعود ومعه ورقة)..

أحمد : هاشغلك حبه يا منى.. لا مؤلخدة يا عصام..

عصام : لا اتفضل..

منى : (ناظرة نحو عصام) عايز حاجة..؟

أحمد : طلعى الأوفرول بتاعى وأكويه.. إفرديه بس بالمكوة
ونضفى الياقة..

منى : إيه يا أحمد فيه حاجة..؟

عصام : جالك استدعا لازم..

أحمد : دلوقت حالاً..

عصام : يبقى أنا هاروح القاهم سايين لى خبر (لمنى) أصلنا
تجنيد واحد..

أحمد : يالله يا منى ما قداميش وقت..

(منى تتحرك لإحضار الأوفرول)

والله زمان يا عصام سنين خدنا فيهم على الميرى
والنشوفيه.. الواحد ساعات يحن للعيشة دى.. زى ما
يحن لأيام المدرسة مع إن كان فيها واجب وصحيان ببرى..

عصام : تعرف أنا باحب أيام التدريب ليه .. عشان لما أرجع البيت

باحس قد إيه قاعدة الولحد فى بيته بالبيجامة وفى

إيده كوباية الشاى حاجة كبيرة ..

أحمد : والله يا عصام أنا حاسس إن النوبة دى بقى هى اللى

فيها الكلام الكبير ..

عصام : إنت برضه النوبة اللى فاتت قلت كده ومغيش حاجة

حصلت ..

أحمد : معاهش بكره يحصل .. نحاربهم مرة واحدة بس .. ده

احنا ماحربناهمش ولا مرة ..

(منى تدخل ومعها الأوفرول تفرده على المائدة لتكويه)

عصام : إنت عارف إنهم فى أى دقيقة يقدرُوا يخلُوا مية القناة

تولع ..

منى : الميه تولع زى البنزين ..!؟

أحمد : أيوه يفتحوا أنايبب النابالم ..

عصام : وتعرف إن فى كل موقع بيرسكوب بيكشف المنطقة

كلها .. يعنى اللى هيدخل هيترصده جوه ..

أحمد : عارف وعارف أكثر من كده ..

منى : طب وبعدين .. يبقى مغيش فايدة والا إيه ..!؟

عصام : أنا مش عارف ..

أحمد : يعنى إيه ؟ يعنى نرفع إيدينا ؟ نرمى سلاحنا ؟..

منى : تنزل ؟ نطاطى راسنا ؟

عصام : لالا..

منى : لو كنا بنخاف، لو كنا بنتهز كنا سلمنا فى 67

عصام : فى 67 الضرية كانت جامدة..

أحمد : بس استحملناها، ثبتنا رجلينا فى الأرض وجزينا على

سنانا وما وقعناش..

عصام : يعنى إيه..؟!

أحمد : يعنى هنجارب..

عصام : هنعدى..

أحمد : أيوه هنعدى..

عصام : امتى..

أحمد : بكره هنعدى..

عصام : بكره غاب قوى وامتى هيجى بكره ده..

منى : (كما لو كان لنفسها) يا ترى يا بكره شكك إيه، يا ترى

هتستاهل انتظارنا الطويل، يا ترى هتبقى لينا والا

علينا هتخيب أملنا والا هتطيب جرحنا شكك إيه

يا بكره..؟!

أحمد : بكره صعب، هتتهد بيوت، وهينزف دم وهيتيم ناس..

عصام : (كما لو كان يسترجع شيئاً) الموت عشان الحياة..
أحمد : هو ده التمن.. الخوف إنك ما تعرفش التمن إيه، الخوف
إنك ما تقدرش عليه، عايز تعيش ادفع دم، عايز تعيش
قدم شباب ضربتنا للعدو هتكون قاضية إن كانت
الإيديين اللي هتضرب هي إيديين كل الناس.. إن كانت
الناس هاتتجمع في إيد واحدة، هتكون الضربة ثقيلة..
ضربة قوتها سنين انتظار..

منى : هتأخر يا أحمد..

أحمد : يا ريت يا منى، يا ريت ما أرجعش بعد أسبوع زى النبوة
الى فاتت..

منى : الحرب هتقوم..!؟

أحمد : أنا قلبى حاسس بكده..

منى : امتى بقى نرجع بلدنا يا أحمد (أحمد صامت) حاتكتب
أول ما توصل..

أحمد : طبعاً هاتكتب..

منى : تعرف إنى شايله كل جواباتك اللي كنت بتتبعها
ومرتباهم فوق بعض..

أحمد : (مبتسماً) عارف، شفتهم فى الدولا..

منى : وأنا شفت جواباتنا شايلهم فى القاموس الأزرق..

(تخل الأم)

- الأم: ماشى يا أحمد.. ١٩
- أحمد: أيوه يا ماما..
- الأم: ما تخليك يا ابنى للصبح تمشى فى النور، الصبح رباح..
- أحمد: مش حتفرق يا ماما..
- الأم: كنت عايز تروح كان نفسك من زمان، أدبك رايح أهه..
- أحمد: أيوه يا ماما كان نفسى، ونفسك إنتى كمان..
- منى: يا ماما ده عصام كمان رايح.. ده كلهم رايحين..
- الأم: يروحوا بالسلامة..
- أحمد: طب مكشره ليه، يرضيكى يعنى امشى وانتى زعلانه..
- الأم: لا يا أحمد هازل على إيه.. كل اللى يجيبه ربنا كويس..
- هو اللى عالم وهو اللى فى إيده الأمر..
- أحمد: لا بقى أنا عارفك كويس..
- الأم: لا الحرب تقوم يا ابنى.. ٢٠
- أحمد: طب والله العظيم انتى عايزاها تقوم..
- الأم: أيوه صحيح بس ربنا يستر.. كان مستخبي لنا فىن ده
- بس.. كنا قاعدين فى بيوتنا لا بينا ولا علينا هدوا
- علينا بيوتنا وحصل اللى حصل 67 نفس الموال..

سبنا حالنا ومحتالنا ومشينا فى الدنيا وبرضه الدنيا
مش سايبانا فى حالنا ..

أحمد : ما تزعلش من الحق يا أمه .. هدوا علينا بيوتنا وما باقواش

حاجة وحيفضلوا يهدوا اللى هنبنيه إن قدروا ..

هدوا علينا بيوتنا نقول الله يسامحكم .. دى مش حد

داس على رجل حد فى أتوبيس .. مش حد رمى على حد

كباية ميه .. ده مش ميه يا أمه ده دم ، دم ناس بريئة ساح ،

دم بنات صغيرة لابسة مرايل وشرابط وجزم صغيرة

ودم ولد شايل العشا ومروح يمد عشان يوصل قبل الأكل

ما بيرد اللى عمل ده لازم يتحاسب ومش أى حساب ..

ذنب كل الناس دى فى رقبتنا يا أمه ..

الأم : يعنى يا أحمد إنت اللى هتزد ولا هتنقص ..

عصام : أيوه لما إنت تقولى كده .. وأمى تقول كده المهم إنه مش

هيبقى فيه جيش ..

أحمد : إيه اللى جرى لنا يا أمه ، بصى لنى وإنت تعرفى زى ما أنا

عرفت مش هى دى منى .. مش هى دى ضحكتها ..

ضحكتها فى آخرها طعم مر .. مش هو ده كلامها ..

كلامها مرعوش ، كلامها ما بيكلمش كلامها نصه فى

عينها ما بيتقالش .. عارفه احنا إيه يا أمه .. عارفه

أحنا بقينا إيه بقينا عيله فى بلد فيها رجل غريبة..
بتسألينى طب وانت هتعمل إيه؟.. مش هاقول هاعمل إيه
الكلام ما عادلوش طعم.. الكلام نكته بايخة.. يا ريت اليوم
اللى كلنا مستنيينه يكون هو ده ونخرج بسلاحنا هى دى
السكة - يمكن صعبة، يمكن وحشه.. يمكن يمكن بس..
هى السكة اللى حترجع لنا كلامنا.. السكة اللى ترجع لنا
ضحكتنا.. السكة اللى ترد لنا روحنا.. يا أمه اليهود خدوا
بلادنا بولادهم وانتوا حترجعوا بلدكم بولادكم..
(—————)

اللوحه الرابعه

(جلسه صاخبة في الأتوبيس، لا نتبين بوضوح معالم الكلمات فيها
لاختلاطها - سببها شجار نشب بين الرجل الصعيدي وزوجته،
واشتراك الركاب في محاولة لتهدئة الجو)

السائق : جرى إيه يا جماعة وحدوا الله .. ده لسه بنقول

إنكم عال وكويسين مع بعض اتحسدنا والا

إيه .. ١٩..

زوجة الصعيدي : إن ما رضيتش تاخذنى معاك .. هاطل عليك

إنى وحدائى

الصعيدي : كتر الكلام والنواح فى وسط الخلايق ما

هيجييش عايد وأصل

الفلاحة : (وقد انسحبت من لسانها) إنت مفترى كده

ليه .. ١٩..

الميكانيكى : معلش يابا أهه احنا يا رجاله نستحمل ..

إنما هى لأ ..

الراكب الانهزامى : فعلاً النسوان عقلها صغير ..

الفلاحة : (وهى تزغده) هو إنت ما تنطقش إلا كفر كده ..

- الصعيدية : (لزوجها) بخاطرك.. روح يا عبد الرحمن
منك لله..
- الصعيدى : ثلاثه بالله إن ماسكتى ساكت لا تخشى
دارك ولا تشوفيه بعينك..
- بهجت : الحلم سيد الأخلاق برضه — ومفيش أحسن
من المعروف..
- الصعيدى : اللى فى دماغها فى دماغها.. انشف من
حباية الدوم..
- الفلاحة : . إنت اللى دماغك طرية أوى..
- الجندي : (متداركاً للموقف) ما تسكتى إنتى يا خاله..
انتى مالك انتى.. هاتشبطيهم فيكى ليه..
- الفلاحة : (تسكت على مضض وهى تشوح بيدها فيما
يشبه الاحتجاج) والله..
- الأم البورسعيدية : يا جماعة احنا فى إيه ولا إيه.. هو ده وقته
برضه.. هو انتوا صغيرين..
- منى : يا ماما..
- الأم : لا يا بنتى الواحد متاخذ خلقه ومفيهوش خلق
للحاجات دى..
- الآنهزامى : مش هنتجر أبداً..

- الفلاحه :** (تخبطه) هو إنت تسكت تسكت واما تيجي
تكلّم تطلع بنصيبه..
- الانهازامي :** هو أنا ما أعرفش أقول حاجة خالص منك.. هو
مفيش حد بيتكلّم فى العربية دى إلا أنا..
معلّش .. ما احنا بقينا نركب البولمان..
- الفلاحه :** وما نركبوش ليه يا أبو فصاده.. مش قد المقام..
- السائق :** (وقد أحس أن أكثر من مشادة قد نشبت) يعنى
أوقفها، أركنها هيه، وادى وقفه (يقف بالسيارة)
- الصعيدى :** (بلهجة أمرة) اتكل على الله إنت مفيش حاجة..
- بهجت :** سوء تفاهم بسيط بيحصل دايمًا.. ومفيش حاجة
بإذن الله..
- الفلاحه :** (للجندى كنوع من استفزاز الراكب الانهازامى)
تعالى إنت يا حسن ربح (للراكب) اتأخر له كده..
اقعد يا ضنايا والله..
- الميكانيكى :** دوس يا ريس دوس.. نهارنا قشطه إنشاء الله..
(بعد أن تنطلق العربة)
- الصعيدية :** ولدى منصاب ما طلش عليه يا عبد الرحمن..
- الصعيدى :** ما تستهدى بالله آمال..

- الأم البورسعيدية : (بلهفة) ماله يا ست..
- الصعيدية : انصاب وراقد فى المستشفى..
- الصعيدى : طخوه فى جنبه..
- (سميحة تحتضن أطفالها)
- سميحة : خليكوا جنبى هنا.. ما تتنقلوش..
- الأم : معلش كله يهون..
- الفلاحة : منهم لله ..
- بهجت : معلش هى الحرب كده.. ولازم تستحملها..
- الصعيدى : (لبهجت) مسكينة.. تصور حضرتك
- وماسكين نفسهم من ساعة ما طلعنا
- ومافتحوش بقهم بكلمة عن ابنهم..
- الميكانيكى : مش الحمد لله شادد حيله..
- الصعيدى : امبارح كلمونا من مستشفى الكنال..
- ولحد بلديه اتكلم وقال إنه كويس وهينزلوه
- مستشفى مصر لما يصلب حيله شوية..
- بهجت : وبإذن الله نازلين مصر علشان تستنوه..!
- الصعيدية : الضنا غالى يا بيه..
- السانق : ما تخافيش يا أمى.. هيجى لك زى الحديد
- إنشاء الله..

الصعيدية : تسلم يا ابنى..

الفلاحة : يسوقك يا محمد يا بن جاد الله..

الصعيدى : لما نتدلى مصرها افوتها حدا ابن أخوى فى روض

الفرج واطلع إنى اطل ع الجدع (ينظر إلى زوجته

ثم يحول نظره إلى الآخرين كمن يشهدهم على

زوجته) دى حنة تطلعها نساوين.. وهى من الصبح

تجولك خدنى معاك.. مخ زى الحجر الصوان..

الصعيدية : أيوه رايحة.. (بعناد)

الصعيدى : ولما أرمى عليها اليمين تجى تبكى وتشلشل على

عمرها.. طب على الطلاق إن ما قطعت الخلس الا

وترجعى البلد..

(يرين الصمت)

الميكانيكى : ولو فيها بواخه حبه.. أنا شايف يا بلدية إن مروح

القنال برضك صعب شوية عليك إنت راخر..

الصعيدى : ونروح طوكر كمان..

بهجت : (متدخلًا شارحًا) أصل المنطقة يعنى منطقة

عسكرية والمدنيين مش سهل يعنى.. يعنى.. جايز

ميسمحوش..

الصعيدى : مين مايسمحش..

بهجت : جايز يعنى.. والأفضل تشوف حد يطلع لك

تصريح مرور.. حد يطلع معاك..

الصعيدى : وهيطلع معايا ليه.. ونسى ولا نديم فى 48 كنت

فى القالوجا وحافظ الكنال وسينا وماحدث

هيردنى..

المعيدة : بس برضه النهارده السكة خطر..

بهجت : قصدما إن فيه غارات وعربيات وقنابل..

الصعيدى : ابنك اتطخ عيار.. تجعد فى البيت زى النساوين..

مات لا سمح الله.. تعيط.. تشيل الكفن على

إيديك.. ولا تطلع بالبارود..

بهجت : يا سيدى للسالة النهارده مش تار ابنك بس.. يعنى

مش تار شخصى ده تارك وتارى وتار البلد كلها..

الصعيدى : ولما هو تار البلد كلها.. هتجعد الرجاله ليه فى

الجحور.. (صمت) فتحي كنت ولخد على خاطرى منه

شوية.. بعد ما علق الدبورة سنه ما نشوفوش فى

البلد الا التخاطيف.. آخرتها من ثلاث اشهر جاه

ليلة الجمعة طل على أمه.. كانت راقدة تعبانه شوية

وسافر نهار السبت حز فى نفسى إنه ما هيجيش..

خفت يكون اتلهى فى البندر فى الهجايص وقلة

القيمة.. وصيت عليه جماعة من البلد.. قام طمنوني
وجالوا ابنك يظهر كادات الجيش شاغلينه اليومين
دول.. بيسفروه هنا وهناك وهو ما يجولش.. ارتاح
بالى ما دام فى الواجب يبقى خلاص.. ويتوع
المستشفى جالولى ماتخافش عليه ده شديد.. وما
وجعش بالساهل.. حلفت بالله لاكون طاخخ أكبر ما
فى رجالتهم بس اتلايم عليه ويكون راجل - ما
عدونيش من الكنال هاليس إنشاء الله كاكى وأروح
إن شاء الله نفر بشريط..
(يرتفع مع صخب الإضاءة الموسيقى الصعيدية فى نغم بهيج)

إظلام

اللوحة الخامسة

(منزل سميحة وصلاح - صلاح جالس يقرأ - وسميحة تمشط شعر)

نورا ونبييل جالس إلى لعبة في ركن قصي..

سميحة : إيه اللي ولادك ولادك.. ما هو ولادك إنت كمان..

صلاح : باقول لك سكتي العيال دول أحسن أقوم لهم..

سميحة : لا ما هي مش حكاية عيال لأ.. إنت صايح تقول

يا خناق..

صلاح : أنا برضه والا انتي اللي بتتلككي..

سميحة : أنا باتلكك أنا.. والله أنا لى الجنة..

صلاح : يعنى ما اقدرش اقعد مرتاح حبه..

سميحة : قول إنك عايز تتخانق بأى طريقة وما انتش لاقى

حاجة..

صلاح : إن كان ع الحاجة فيه ميت حاجة تخلى الواحد

يتخانق.. بس الواحد جى على نفسه وملايمها..

سميحة : إنت جى على نفسك.. معلش الحق على.. أنا اللي

جيبته لنفسى كان قدامى أشكال وألوان..

- صلاح :** معلش.. العتب على النظر..
- سميحة :** مش عارفه أنا كان نظرى جرى له إيه ساعتها.. مع إن عيني وسع كده.. إنما معلش ربنا عايز كده.. ليه حكمه فى كده صحيح ساعة القضا يعنى البصر..
- صلاح :** ممكن تطفى الحكم دى لنفسك وتسيبيني اقرا..
- سميحة :** إنت من امتى بتقرا..؟!
- صلاح :** ممكن يا سميحة تسيبيني اقرا..
- سميحة :** ما اعرفش أنا إيه اللى حلو أوى فى المجلات دى..
- (صلاح يضحك)
- صلاح :** يا خبر، خفة دم إيه دى يس يا سلام يا ولد..
- سميحة :** شوية صور بايخه وكلمتين رخصين..
- صلاح :** مش خسارة فيكم الواحد يعمل اشتراك سنوى..
- يا سلام الثقافة حلوة أوى.. أحسن من النكد يا بو صلاح.. تاخد مجلتك وتقفل عليك وتقرأ بقى زى ما انت عايز..
- سميحة :** قال يعنى العلم واخذ حده أوى.. بطلوا بقى الحركات دى..
- صلاح :** عايز أركز فى الموضوع اللى معايا ده..
- سميحة :** ما تركز هو أنا ماسكاك.. تعالى يا نورا.. تعالى يا روحى تعالى يا قمر..

- صلاح :** بطلى زن..
- سهيحه :** (غير ملتفتة إليه) معلش يا قمره.. طبعاً زعلانه من الشقار والنقار ليكى حق.. مش طايقك ولا طايقنى..
- صلاح :** أيوه تسمى افكار البنات من دلوقت بطلوا بقى الشغل البلدى ده
- سهيحه :** يا خويا أنا مش عارفه إيه العلم اللى نزل عليك ده، يا دى الهنا ازغوط.. (لا يلتفت إليها ويواصل القراءة فى المجلة) مش طايق يبص فى وشى.. حاطط وشه فى المجلة..
- صلاح :** مبسوط يا ستى حد شريكى..
- سهيحه :** أيوه لازم صورة ممثلة ولا واحدة حلوة..
- صلاح :** (ضاحكاً) عليكى نور.. صورة حلوة..
- سهيحه :** والله أنا عارفه ذوقك، ممكن أشوف؟
- صلاح :** ما دام عارفه ذوقى.. يبقى هتبص ليه..
- سهيحه :** عشان فرحتى تكمل..
- صلاح :** مش لازم تفرحى..
- سهيحه :** (تغير لهجتها إلى الأنعم) صلاح ورنى يا حبيبى بتبص على إيه..

صلاح : لا يا سميحة بلاش يا حبيبتي لتتعتدى..

(تقترب سميحة منه وتخطف المجلة وتقف بعيداً، تضحك وهو محرج)

سميحة : يا دى الطعامة.. يادى الحلاوة، أما حتة دين صورة،
قمر إيه خفة الدم دى.. إيه الرشاقة دى، لى حق اتعقد
(فى جدية) أنا هاجيب لك ماما، هاقول لها صلاح
سايينى ويبيص لصورة جدى فى المجلة..

صلاح : ده موضوع عن جلود الحيوان.. موضوع علمى..

سميحة : أنا تسيبنى وتبص لجدى.. (يضحكان)

صلاح : بتشدى المجلة من إيدى ليه، مش تبطللى الحاجات دى..

سميحة : عشان كنت عارفه إنك لا بتقرا ولا حاجة..

صلاح : أش عرفك..؟

سميحة : صحيح دابب وشك فى صورة جدى لكن ودانك

معايا.. على وشك بيان يا نداغ اللبان..

صلاح : باقول لك إيه.. ما تحطيش سكر كثير.. وحاجة كده

خمسين..

سميحة : أيوه اسحب ناعم.. ما كنت باتحایل عليك.. على

- العموم الشاى جاهز بس سخنه (تنتهز الفرصة)
 بقى أنا مش عاجباك يا سى صلاح..
صلاح : بقى لو مش عاجبانى كنت عملت اللى عملته
 عشان نتجوز..
سميحة : صحيح يا صلاح اللى إنت عملته ماحدش عمله
 أبداً.. ويا عينى كنت لوحذك قصاد الغيلة كلها..
صلاح : وحتة عيلة، منتخبة كل واحد ولبتاني، وكل واحد
 يبرق لى زى ما أكون قتلت له حد..
سميحة : يا عينى يا صلاح كنت صعبان على بشكل وده اللى
 خلانى أتمسك بيك أكثر..
صلاح : ما تفكر نيش يا سميحة.. ده أنا شفت الوليل وكنت
 مستحمة عشانك..
سميحة : صحيح يا عينى يا ما وقفت تحت قدام البيت فى عز
 السقعة..
صلاح : فاكروه لما نظرت..!
سميحة : وإنت يا عينى ما انتش عايز تتنقل وكل ما النظرة
 تهذا يقوم الجو قالب وتقوم رحه تانى..
صلاح : رقدت فيها جمعة..
سميحة : ده أنا عيطت عياط.. وأبص من الشباك مالفاكش

أقول جرى له حاجة، دى لو الدنيا بتنتظر نايالم مش
هايتنقل..

صلاح : كنت نايم عيان وباخرف، وياقول لما امتك ليه كده، أل
يعنى هى اللي خلت النظره تنظر..

سهبيحة : لما بعت لى كنت بامد واقول يا رب ما يجرى له حاجة
قبل ما روح له..

صلاح : طلب إيه رأيك إن اللي تعبنى مش الالتهاب الرئوى 33
يوم قاعد فى القهوة عيني على الشباك
والبلكونه..

سهبيحة : ده أنت كويس إنك ما حولتش..

صلاح : كنت كل ما أبص لحاجة ألقى شباك وبلكونه
الأوتوبيس كان حيعورنى كان جى على وأنا مش
شايف قدامى إلا شباك وبلكونه وكنت باضحك
ومبسوط..

سهبيحة : والدكتور عمل لك إيه.. تلقاه شكشك لك عينيك
وشغل بقى القطرة..

صلاح : ده أنا قلت له أعمل لى عملية شيل الشباك والبلكونه من
جوه عيني الدكتور بص لى وافتكرنى مجنون قال لى
ما تخافش هنفكها ونزلها ونركب لك شباك تانى..
مش عايزنا نبیض كمان (يضحكان)

- سميحة :** الواحد ييفتكر لك حاجات كويسه كثير..
- صلاح :** وانتى يا سميحة هو اللى انتى عملتيه شوية..
- سميحة :** أنا نفسى اضحى عشانك يا صلاح ، نفسى اعمل أكثر من اللى اتعمل نفسى اعمل لك حاجة كبيرة..
- صلاح :** أنا ما انسى ليكيش يا روحى لما قطعنى شريانك فى الكازينو ووقعنى فى الأرض والدم نازل منك..
- سميحة :** انت مش شوية يا صلاح ، وحياتى من غيرك ماكانتش هيبقى لها أى معنى ولا طعم..
- صلاح :** والا لما شربتى بوليس النجدة ، ولونك بقى اصفر وعينيكي زاغت..
- سميحة :** وأنا يا صلاح ما انسى لكش أبداً لما رميت نفسك من رابع دور.. يا سلام.. ذكريات حلوة.. اشرب الشاى اشرب يا حبيبى..
- صلاح :** تسلم إيدك يا سميحة.. مش عارف ليه الشاى اللى بتعمليه بيبقى حاجة تانية، مش زى أى شاى باشربه..
- سميحة :** مفيش شاى حلو من غيرك يا صلاح..
- صلاح :** اشرب سيجارة بقى علشان الشاى يحلى.. (يخرج سيجارة)

سميحة : رجعت تانى للسجاير يا صلاح..! إنت مش كنت بطلتها..

صلاح : يا سميحة ما تدقيش..

سميحة : طب إذا سمحت يا حبيبي أبعد السيارة أحسن الدخان بيخنفنى..

صلاح : الله.. جرى لك إيه يا سميحة..!

سميحة : أنا برضه اللي جراتي..

صلاح : إذا ما كنتيش حاسة باللي بتقوله فده مش ذنبي..

سميحة : إنت بتدور على الحاجة اللي بتضايقنى وتعملها..! رجعتا تانى للكلام إياه..

سميحة : كلام إيه بقى ؟! ما أنا باتبلى عليك..

صلاح : من الناحية دى فأيوه.. انتى بتتبلى..

سميحة : بتشتمنى يا صلاح..

صلاح : والله بقه افهميها زى ما تفهميها.. أنا هاسيب لك البيت وأنزل..

سميحة : لأ.. ده أنا اللي مش هاقعدك فيه ولا دقيقة..

(ينهض كل منهما غاضباً.. وتنسحب الإضاءة لتنتقلنا إلى الأتوبيس لتتركز على سميحة وقد شرعت فى كتابة خطاب وفى

نفس الوقت تضاء بقعة أخرى من المسرح على الجبهة حيث صلاح
جالس هو الآخر فى موقعه وإلى جواره سلاحه.. يكتب خطاباً هو
الآخر وتناسب موسيقى غاية فى الرقة والنعومة..)

نبيل : عايز أكل يا ماما..

سميحة : حاضر لما نوصل هناكل كلنا يا حبيبى..

نورا : ماما أنا عايزه اتبرع بالدم يا ماما..

سميحة : حاضر يا حبيبتى.. بس سيبنى دلوقت عشان اكتب

جواب لبابا

نبيل : وأنا كمان..

سميحة : لما تخش المدرسة إبقى اخليك تكتب له..

نورا : قولى له تعالى بقى يا بابا.. وحشتنا أوى.. نورا زعلانه

منك..

(تسرح الأم والقلم فى يدها وتبدأ فى كتابة الخطاب.. ومن
الممكن تسجيل كلامها وأيضاً كلام صلاح وممكن أن يكتب كل
منهما ويردده فى نفس الوقت والحل متروك للمخرج..)

سميحة : يا ترى عامل إيه دلوقت يا صلاح.. نايم.. صاحى..

تعبان.. مستريح.. يا حبيبي يا صلاح.. تعرف إن
البيت من غيرك دمه ثقيل.. احنا كويسين.. أول وتانى
يوم غبت فيهم كنت هاتجنن.. وبعدين كل ما اسمع
الراديو.. كل ما اسمع بيان كأنى شفتك بالظبط..
رينا يوفقك يا حبيبي..

صلاح : يا ترى بتعملى إيه دلوقت ؟! أقولك أنا.. إذا الجواب

وصلك الصبح تبقى بتحضرى الفطار وبتلبسى
نبيل، وإذا وصلك بالليل تبقى قاعدة تحكى لنبيل
ونورا حواديت.. نبيل عامل إيه ؟! بيسأل على طبعاً..

سهيلة : ماكنتش عارفه إن غيابك هيعمل فيهم كده.. زى ما

أكون أول مرة باعرفهم.. نبيل مشتاق لك أوى.. إنما

بيحبنى أكثر (تبتسم وتغمز لصلاح كأنها تراه

أمامها فيبتسم هو الآخر...) إذا سمع أى خبطة

على الباب يقول بابا ويفرح ويجرى يفتح.. ساعات

باب الجيران يخطب.. يجرى برضه ويقول ده بابا..

حافظ البيانات اللي اتقالت بيان بيان.. وماسك نوته

ويحسب فيها الطيارات اللي وقعت ويسأل بابا

هيبجى بعد البيان نمرة كام..؟!

صلاح : ونورا إزيتها ؟! طبعاً فاهمة كل حاجة.. وحشتها..؟!

سهيحة : طبعاً إنت عارف أنها الأسبوع اللي فات كملت خمس سنين .. إنما زكية بشكل .. عرفت إنك مسافر ازاي ما أعرفش .. أهى دلوقت قاعدة حاطة إيدها على خدها وسرحانه .. طالعة لستها الله يرحمها بقة .. كانت تقعد القعدة دى بالظبط .. كل يوم الصبح تقعد على باب أودتك تستناك لما تخرج وفى إيدها العروسة آل يعنى عايزه تديها لك .. إيه يا بنتى الأخلاق دى كلها .. انتى .. ده انتى تجننى بلد .. ساعات تمسك عدة الحلاقة وتمشيها على دقنها وتضحك آل يعنى فين اللي كان بيخلق .. فين بابا .. ؟!

صلاح : يا ترى الشقة بقة شكلها إيه دلوقت ؟! حطيتى السفر بالعرض ؟ أحسن عشان توسع الصالة ..

سهيحة : طبعاً عايز تعرف الشقة بقى شكلها إيه ؟! كل حاجة زى ما هى ما غيرتش فيها حاجة .. عندك حق السفر تفضل بالطول أحسن .. بتخلى الصالة مليانة .. ها عترف لك اعتراف بس إوعى تسوق فيها .. تصور .. وحشتنى ريحه السجاية وهى مالية الأوده وإنت قاعد لابس البيجامه وبتشرب الشاي وبتقرأ فى مجلة .. يا ترى عندك وقت تقرا ؟

تصدق أنا دلوقتى باشتري المجلات.. طبعاً هتقول
إيه الثقافة اللى نزلت عليها فجأة دى بس نورا
بتخلى المجلة حنت.. أظن إوعى تقول بقه إنى
مش حاسه بيك.. تعزف جاييه لحد دلوقت كام
خريطة لسينا.. سبعة.. اتنين منهم بالأكوان وعارفه
اللى بيحصل أول بأول.. أنا باستغرب.. ازاي الأول
ماكنتش باسمع حتى نشرة الأخبار.. مش من البلد
دى زى ما كنت بتقول..

صلاح : لما الحرب تخلص هابقى جنبك على طول.. وهنبص
لنفسنا حبه وهانتبه للعيال بقى.. ندخل نورا الحضانة
اللى جنب البيت.. ومتهاىلى البيت ضاق على الولاد
حبه.. ناخذ بيت أوسع، ويا ريته بجنيته علشان الولاد
يلعبوا فيها.. وكل أسبوع ناخذ بعضنا ونقضى يوم
فى البلد.. العيال بيحبوا البلد قوى.. نروح الخميس
الضهر ونرجع الجمعة بالليل.... وجمعة تاخذ نبيل
ونورا الصبح يشوفوا ميكى ماوس.. نورا بتحبه أوى..
وهاغيرلك الستاير يا ستى.. وعلى فكرة هابطل
السجاير عشان ما تبقيش تتضايقى من ريحتها..
سهبة : تعرف يا صلاح اشتريتلك إيه؟! ولاعة شكلها حلو
لوى، هاتعجبك أما تشوفها..

(تبدأ أصوات الانفجارات وأزيز الطائرات فى الارتفاع ونشهد بداية اشتباك فى الجبهة فيؤجل صلاح إكمال الخطاب ويبدأ مع جنوده فى الاشتباك مع العدو.. وفى نفس اللحظة يفاجأ ركاب الأتوبيس بطائرات إسرائيلية تغير على المكان الذى هم فيه..)

أسيبك دلوقتى يا صلاح أحسن فيه غارة.. تعالوا يا حبايى هنا..
(أصوات طائرات وانفجار قنابل)

المعبدة : تعالى معايا يا حبيبتي..

سهيحة : روحى لطنط يا نورا..

السائق : والنبى يا جماعة كلنا بالهداوة كده ننزل ونسيب

الأتوبيس اللى معاه عيل يخلى باله منه..

(يبدأون فى مغادرة الأتوبيس حتى تنتهى الغارة)

بهجت : على مهلكم كله ينزل على مهله..

الفلاحة : خد إيدى والنبى يا حسن يا أبنى..

الأنهزامى : حاسب على الشوال..

الفلاحة : ياخويا إنت راخر..

الميكانيكى : ما تخافوش كلها دقيقة واحدة ونطلع تانى.. بإذن

الله حنشوفها مولعة فى الجو..

الصعيدى: أه يا كلام يا جبنات والله متقعوا زى الحدادى
الدايخه يومك جه يا ضفدع وماحد هيغيتك..

(ستار)

الفصل الثاني

اللوحة الأولى

(انتهت الغارة.. الكل ينفذ ثبابه ويتأهب لركوب الأتوبيس - السائق أصيب بحروق في ساقه ويتحامل على نفسه بينما يسنده الميكانيكي والجندي اللذان يعاونان النسوة على الركوب.. سميحة تبكي لأنها لا تجد نبيل طفلها الذي اختفى أثناء الغارة هو والصعبدى..)

الجندي : وسعوا يا جماعة وسعوا..

الفلاحة : يالهوى الرجل بيغرفر..

بهجت : يا ست دى حاجة بسيطة مقيهوش حاجة.. الهوا طير

حتت والعة من الطائرة نزلت على رجليه..

(المعيدة تتقدم وتفتح حقيبتها)

المعيدة : حد معاه قطن والا شاش..!؟

الانتهازي : أنا معايا باكو قطن بس يا خسارة، جاييه للبيت..

الميكانيكي : باقول لك هات القطن..

الانتهازي : خلاص الواحد يشتري لهم باكو تانى بقى.. ولجب

برضه، عارف ده تمنه كام ؟ والله دافع فيه ربع جنيه..

الفلاحة : يا باى كل اللى يطلع منك سو كده..

سميحة : لأ مش هاقعد إلا أما اشوف ابنى بعينه..

الأم : ماتخافيش، يعنى هيروح فين ١٩٠٠

(الصعيدية تصعد)

الصعيدية : سيد الرجاله ماعادش واصل والليل دخل علينا ،

ارجع من غيرك يا عبد الرحمن ؟ ده أنا كنت ادفن

نفسى بالحيا ..

الجندى : أنا شايفه عند الشجرة الكبيرة وكويس مافيهوش

حاجة ..

الصعيدية : يا ريت يا ابنى يبقى لك الحلاوة، ده النار كانت

بتنطر على الجانبين

السائق : (للمعيدة) أشكرك قوى يا بنتى كتر خيرك، أنا

بقيت كويس يا جماعة شوفوا الحريم اللى هناك

مالهم ..

الأم : (إلى الصعيدية) أنا شايفاه مع الولد الصغير

بيجروا بعيد عن الطيارة ..

الصعيدية : يا ريت، يا ريت يا ست الستات يا أم لسان حلو،

ما هو أصل عبد الرحمن واعر ويعرف فى كل

حاجة، كل عيلة رشوان كده.. صاحيين زى الدم

ربنا يحميه ويحمي الكل.. يا ترى فينك يا عبد
الرحمن..

سميحة : يا ناس حرام عليكم.. حد ينزل يشوفهم، يمكن
جرى لهم حاجة.. لو رجعت من غيره.. يا خبر..
مش ممكن.. أنا هانزل أدور على ابني (الطفلة نورا)
تبكي بينما تمد المعيدة لها يدها)

المعيدة : تعالى يا ماما، تعالى هنا يا نورا اقعدى جنبى..
(نورا تتحرك حيث تجلس المعيدة تتحرك الفلاحة نحو
مقعدھا)

منى : أنا نفسى اللى بيدوا لإسرائيل السلاح يشوفوها
بتعمل بيه إيه.. يشوفوها وهى بتهد البيوت، وهى
بتولع فى الزرع.. اليهود أهم.. على الطبيعة، مش
فى صور المجلات، مش فى الكتب الملونة..

سميحة : أنا نازلة أدور على ابنى..

منى : خدينى معاكى.. (تخرجان من العربية)

الفلاحة : (للجندى) إيدك يا ابنى الله يسترك، خد إيدى يا

حسن..

الجندى : (يساعدها) هه، شدى حيلك، يا خبر ده انتى فيكى

قوة..

الفلاحة : والنبي أبداً، ده بس ربك ساترها.. ده أنا كلى
 أمراض (تصطدم بالانتهازي) يا خويا ما توعى كده
 إنت إيه اللي مقعدك هنا ما تنزل تشوفهم..
الانتهازي : يا ست أنا عملت لك حاجة، ما تسيبيني فى حالى..
الفلاحة : عارفه هتقول لى الشوال، والنبي أنا نفسى
 اعرف الشوال ده فيه إيه (بصوت خفيض للجندى
 مشيرة إلى الانتهازي) ماكانش هو اللي يتوه.. لأ..
 اللي متعازين هما اللي يتوهوا..
المبكانيكى : باقول أنزل أشوقهم.. أنا نازل يا جماعة..
الجندى : خليك إنت أنا هاتصرف..
بهجت : استنوا شوية، أن ماجوش ابقوا انزلوا..
المبكانيكى : ما يصحش نسيبهم كده مش يمكن لا مؤاخذه
 فى مازق..
الأم الفلاحة : (للانتهازي) شايفين الرجالة..
 (نسمع صوت الصعيدى قادماً) أه يا عالم زى
 الكلام الأبيض فيهم نجس، حاكم ماتجوش إلا
 بالطخ..
 (يصعد العربية ومعه نبيل.. وقد احتضنته أمه بينما تستقبل
 الصعيدية زوجها)

- الصعيدية :** قلفتنا عليك يا عبد الرحمن..
- الصعيدى :** هتقلقى ليه ؟ ده لو جيش عرمرم سابقاه مزيكه
ما هيتهنزليش طرف..
- الانتهازى :** على الطلاق ما شفته..
- الفلاحة :** أه منك إنت يا أبو شوال (لنفسها) والنبي لاعرف
الشوال ده فيه إيه..
- نبيل :** قلت له خدنى زقنى وقال لى أنا مش فاضى لك..
- الصعيدى :** أه يا ناقص ربايه ودين.. تحلف بالطلاق وإنت ما
تعرفش من سبحان الله..
- سهيحة :** (وقد اقتربت للصعيدى) انتوا رحنوا فين..؟
- الصعيدى :** ورا الطيارة النارية..
- سهيحة :** ووقعت برضه..
- الصعيدى :** جعدت تتطوح وتتمايل لحد ما انطخت.. جابتها
الكنابل الصوارىخ وبيجت تسقط زى حباية
الرمان العطبانة.. الطيارة اللى كانت عامله
حس وعم تطخ فى النساءين بقت زى كورة
الطروز اللى العيال بيلعبوا بيها الأجران، متعاصه
جاز والنار مولعة فيها..
- منى :** الطيارة اللى تدخل لازم تقع، لازم يتربوا، لأن
يتعلموا الكلاب..

بهجت :

شبابنا بخير ، شبابنا صاحى لهم..

الأم :

كلامك صحيح ، وقت الجد شبابنا بيبان على
حقيقته ، جدعان وشغالين وما بيخافوش.. طبعاً
يبقى لازم الطيارة تقع..

الصعدي :

3 طيارات انطخوا واحدة فى ديل لختها.. واحدة
سختت وما بانتش واصل والثانية تننتها طيارة
والولة ماسكه فى جناحتها والثالثة اللى جرينا
وراهما عشان أملى عينى منها وهى بتتفرتك
عشان أطفى الجير اللى عم بياكل فى صدرى..
يسلم يمينكم يا اللى طخيتم..

الفلاحة :

وجاين يضربوا فينا احنا ، إن شاء الله يتلبوا فى
قلوبهم..

بهجت :

عارفة ضرب الدينين معناه إيه..؟!

الجندي :

معناه إن العدو طول عمره جبان وما عندوش ضمير
ولا أخلاق..

بهجت :

العدو بيضرب الدينين عشان مش قادر على
العسكريين زى واحد معاه سلاح ولقى اللى قصاده
معاه سلاح ومش قادر عليه يقوم يهرب منه ويضرب
ابنه الصغير أو بنته أو مراته عشان مامعاهش سلاح..
حجة العاجز يعنى..

- منى: حجة الجبان، حجة السافل..
- الجندى: إحنا مش هنسيبهم الجبنا..
- الأم: هى دى طريقتهم عشان الناس تخاف وتفتكر إن الدنيا هتتهد..
- منى: الدنيا هتتهد أه بس على دماغهم هما.. وهيتحط بوزهم فى الطين عشان يعرفوا يعنى إيه بيت يبقى كرم تراب.. يعنى إيه ابن ما يرجعش بيته، يعنى إيه بنى آدم يتحرق..
- الميكانيكى: شوفوا لا مؤلخذه جنس إسرائيل يفضل ينكش على نفسه لحد بإذن الله ما يتخرب بيته..
- الأم: ربنا يهدهم قاعدين فى بيوتنا لا بينا ولا علينا، صحيح يا قاعدين يكفيكم شر الجاين..
- الميكانيكى: لما العالم دى تطلع من دماغنا هنفوق قوى..
- منى: لما ياخدوا جزاءهم لما يدفعوا التمن..
- السائق: خلاص يا جماعة نطلع..
- الميكانيكى: اتكل على الله يا سواقنا يا مجدع..
- السائق: يظهر يا جماعة مش هاقدر اطلع بالعربية..
- الفلاحه: يا ليلة غبره يا جدعان..
- الانتهازى: طب وبعدين.. إحنا ورانا مصالح (بصوت

منخفض) لا مؤلخذه نلم حاجة ونديها له فى إيده

يمكن رجله تخف..

بهجت : عيب الكلام ده عيب..

الفلاحة : إنت اللى بتجييه لنفسك.. اقعد ساكت اكتم النفس

خالص..

الأم : طب والعمل.. منفضل هنا للصبح..

بهجت : قعادنا هنا خطر علينا، وكمان هننام ازاي، الستات

والأولاد هتتبهدل..

الجندى : أنا لازم أوصل فى ميعادى بأى طريقة..

الفلاحة : أيوه يا كبدى عارفه، لما محمد أبو جاد الله بيوفوته

القطر تبقى دماغه هتوج..

المبيعدة : طب والعمل..

سميحة : لازم نتصرف الوقت بيجرى..

بهجت : حد بيعرف يسوق..

المبكانيكى : أنا معايا رخصة ملاكى بس مش ولخد على

السكة دى..

الانتهازى : لا أعمل معروف إحنا ورانا أشغال..

السائق : أنا هاقعد جنبك..

بهجت : ده الكلام للصبح..

الميكانيكى : (يتحرك حيث مقعد القيادة) باسم الله الرحمن
الرحيم - اتكلنا على الله (تتحرك العربة وعند
ما يلمح للميكانيكى تباريح الألم على وجه
السائق ينصحه بأن يغنى ليتغلب على الألم،
وهكذا يشترك الركاب جميعاً فى أغنية بهيجة
تحلم بالنصر وتبشر به مهما طال الطريق)
(—————)

اللوحة الثانية

(تبدأ هذه اللوحة بمشهد يجمع المعيدة وخطيبها)

- المعيدة : أنا مش هالف ولا هادور معاك .. أنا هاكلحك
بصراحة ..
- الخطيب : والله أنا اليومين دول بقيت أخاف من صراحتك ..
- المعيدة : أنا مش هاسافر ..
- الخطيب : بلاش هزار .. أحسن أنا مش فايق النهارده ..
- المعيدة : أنا ما بهزرش أنا مش مسافر ..
- الخطيب : انتى عارفه معنى اللى بتقوليه ده إيه .. ؟
- المعيدة : أيوه عارفه ..
- الخطيب : والله انتى لا عارفه ولا حاجة .. لو عارفه ما تقوليش
كده ..
- المعيدة : كل واحد حر يفكر زى ما هو عايز ..
- الخطيب : حر يعنى إيه .. هو انتى بتقولى أى حاجة وتقولى
حره ..
- المعيدة : أنا ما بقولش أى حاجة ..

- الخطيب : مش هاتسافرى يعنى إيه ..
- المعيدة : يعنى مش هاسافر ..
- الخطيب : يعنى أنا اسافر لوحدى ..
- المعيدة : دى حاجة تحددوها إنت ..
- الخطيب : خلاص .. دلوقتى بقينا نقول انت وانا .. أنا كنت حاسس فعلاً إنك متغيرة الأيام اللي فاتت .. وكل ما أكلمك عن كندا أحس إنك مش متحمسه زى ..
- المعيدة : كويس إنك كنت حاسس .. أنا نفسى ماكتتش واعي .. ده على الأقل مش مفاجأة ليك ..
- الخطيب : لا طبعاً مفاجأة لأنى ماكتتش متصور إنها توصل لكده ..
- المعيدة : أهى وصلت ..
- الخطيب : ويتقوليها كده ببساطة .. مش هتسافرى يعنى إيه ؟
- انتى عارفه أنا هاشتغل هناك بكام وانتى هتشتغلى بكام ..
- المعيدة : أنا مايفكرش فى كام دلوقت ..
- الخطيب : آمال بتفكر فى إيه ..
- المعيدة : يا محسن ممكن تأجل الكلام ده لوقت تانى تكون فيه أعصابنا مستريحة ..

- الخطيب :** لا ما أجلس أنا لازم اعرف دلوقتى إيه الحكاية من أولها لآخرها .. كلمينى بصراحة فيه حد تانى فى حياتك ..
- المعبدة :** إيه الكلام اللى بتقوله ده .. مش أنا اللى اعمل كده .. إنت ما خطبتنيش غصب عنى ..
- الخطيب :** ما انتى لخطبتينى يا سهام .. الهجرة دى أنا مش عاملها علشانى بس .. عشانك إنتى كمان .. عشان يبقى عندك على الأقل تلاجة وعريية .. عشان تلبسى كل اللى فى نفسك .. أنا بابص لمستقبلنا وهو ده أحسن طريق ..
- المعبدة :** أنا مايفكرش إنك بتعمل كده عشان مستقبلنا ..
- الخطيب :** أيوه يا سهام عشاننا إحنا ..
- المعبدة :** بس إحنا دلوقت مش متففين على الطريقة ..
- الخطيب :** يبقى ما بتحبنيش ..
- المعبدة :** رجعنا بقه للكلام اللى لا بيودى ولا بيجيب ..
- الخطيب :** اللى بتحب واحد تروح معاه إن شاء الله أى حته — ومش إنتى أول واحدة تروح مع جوزها ..
- المعبدة :** أنا عارفه ومقدرة نتيجة كلامى يا محسن ..
- الخطيب :** مقدرة ازاي بقى .. إذا كنت بتقولى مش هتسافرى ..

- المعبدة :** على العموم إذا كنت زعلان.. أنا برضه زعلانه ويمكن أكثر منك..
- الخطيب :** أيوه قولى له كده.. قولى إنك جايه بايعة كل حاجة..
- المعبدة :** إنت عارف إنى مش أنا اللي بعمل كده..
- الخطيب :** إنت بتتسى بسرعة.. أول ما خالى بعث لى الجواب ووريته لك عملتى إيه.. ده إنتى مسكتى طابع البوسته وقلبتيه وقلتى عليه حلو..
- المعبدة :** (مقاطعة) أيوه وكنت مبسوط لأنه افتكرك..
- الخطيب :** وسألتينى عايش ازاي.. عنده عربية، الشقة اللي سكان فيها بتاعته والا بالإيجار..
- المعبدة :** أنا ما أنكرش إنى كنت موافقة على الفكرة..
- الخطيب :** الفكرة..؟! كل ده كان فكرة.. والباسبور اللي طلعتيه والشهادات اللي جبتها والجوابات اللي بعثتها لخالى.. لا الحكاية فيها حاجة إن كنتى مش عايزانى خلاص قولى.. أنا مش هاغضب عليكى..
- المعبدة :** والنبي يا محسن الكلام ده مالوش لزمه..
- الخطيب :** طيب أقولك إيه بس.. حيرتيني - إيه السبب - أصل مفيش حاجة من غير سبب.. قولى يمكن يطلع عندك حق..

- المعبدة :** مش عارفه أقول لك إيه .. حسيت إن خروجي من البلد زى خيانة ليها ..
- الخطيب :** مش ده السبب برضه .. طيب ما حسيتش ليه قبل كده لما قلت نهاجر ..
- المعبدة :** ساعات الواحد حاجة مغرية أوى تاخذ كل انتباهه وبعدين يفكر إنه نسى حاجة مهمة ..
- الخطيب :** أيوه .. إيه هى بقى الحاجة للهمة اللي افكرتها ..
- المعبدة :** هى مش حاجة واحدة .. هى أكثر من حاجة .. بس حاجة واحدة هى اللي جابت الكل ..
- الخطيب :** كويس إيه هى ؟!
- المعبدة :** كنت بادور على كتاب فى البيت .. لقيت رواية ..
- الخطيب :** (مقاطعاً) انتى حتسمعى كلام الروايات ..
- المعبدة :** لقيت كتاب من كتب أخويا عادل الله يرحمه، كاتب عليها كلام وراسم واحده حلوة بصفائير، افكرته ..
- الخطيب :** أنا النهارده مش قادر أفهمك خالص .. عماله تقولى لى الروايات وبعدين عادل، مش عارف إيه دخل كل ده بموضوعنا ..
- المعبدة :** معلش أصبر على شوية، إنت عارف عادل كان صاحبي أنا وكنت باقول له على كل حاجة تفكر

لو كنت أنا اللي مت فى الحرب مش هو يا ترى كان
هيعمل إيه.. يا ترى كان يسيب البلد ويدور على
للعيشة السهلة.. وأنا اليهود قاتليني..

الخطيب : مش فاهم، يعنى إنتى اللي هتجارى اليهود.. إيه
أميرة الانتقام..؟!

المعيدة : أرجوك يا مدحت ما تتريقش على إن مشيت نفسيتى

حتتعب أوى.. يمكن هاحس بالذنب هاحس بانى كان
لازم اعمل أى حاجة ولو صغيرة عشان أخويا..

الخطيب : يا سهام.. أنا طالب منك تردى بكلمة واحدة على
سؤال واضح هتسافرى معايا كندا والا لا..

(مع الموسيقى نعود إلى الأتوبيس وقد استغرق الجميع فى
الضحك عدا سهام الوحيدة التى تطل من النافذة شاردة)

الميكانيكى : بس ولا المؤلخذه كبسوا عليه وهو زى ما ولدته والدته
بالفنله والفنله برضه، لا مؤلخذه قاعد قدام الطشت
بياخد له فمين.. قالواله إيه بقى تعالى معانا نشترى
مشابك..

الفلاحة : يا أخى انشبكوا كلهم فى نار جهنم، سلسال مهيب
وشهم عليه غضب الله من فعلهم..

الميكانيكى : لا مؤلخذه مسكوه، قام يزق بالنحوى لا تقتلنى
يا مصرى، أنا مصرى هرشه من لغوته قام
معلقه ..

الفلاحه : بيتكلموا بالعربى، عشنا وشقنا ..
بهجت : أصل فيه منهم بيعرف عربى يهود اتربوا فى
بلادنا وماتمرش فيهم خيرنا ..

الصعيدى : ما هم زى الكلب السعران .. يعض الإيد اللى
طعمته ..

الميكانيكى : ده بيقول لك مسكوا واد منهم ما يخشس من
الباب ده، عيط على النعمة عيط بالدموع، وبرك
على الأرض وقال لهم إيه بقى لا مؤلخذه أنا عيل،
عالم فارده، بالك إنت .. طب اسمع دى، واحد
ساعات يهرب ابنه مات فكتبه فى الجرنال كتب
كوهين ينعى ابنه قالوا هتدفع برضه حق سطر
بحاله قام كاتب كوهين ينعى ابنه ويصلح ساعات ..
وخذ دى كمان .. (يسترسل فى نكاته والجميع
غارقون فى الضحك ماعدا المعيدة ومنى .. الانتظام
بالضحك عندما تنظر إليها أمها .. بهجت يتلفت فيجد
المعيدة سهام ساهمة) ..

بهجت : المودموازيل مش معانا..
 المعبدة : يعنى..
 بهجت : ما تفكريش كثير، كل حاجة بتتحل..
 المعبدة : تفتكر..
 بهجت : فى الجبهة..
 المعبدة : فى كندا..
 بهجت : افندم..
 المعبدة : هاجر، ماعجبوش الحال..
 بهجت : وانتى ناوية تحصليه..
 المعبدة : معقول..

(تعود إلى الضحكات وقد تحول محورها إلى الفلاحة التى
 جعلت تناوش الانتهازى)

والنبي إنت باين عليك يهودى من ساعة ما ظهرت وإنت محتاس
 بالشيل اللى معاك دى، والا النوته للى عمال تحسب فيها واللى
 يبجى ربح منك تداريها فى كملك..

الميكانيكى : بيقولك لا مؤلخذه خط بارليف ده زى الجبنة
 اللامؤلخذه الفلمنك اللى واكلها الدود..

الفلاحة : جنبه بارليف وأبصر فلمنك ؟ هو فيه أحدى من

الجنبنة القريش..

الميكانيكى : رخرين إيه يا خاله.. الجنبنة عندهم مولعة.. الخرطة

اللى يدويك تحطيتها فى سندوتش بجنبه وياتنين..

روخرين لما حد فيهم ييجى يشبك واحده بدل ما

يجيب لها أسورة ولا حاجة.. يشكل لها من عند

البقال حته رومى على حته فلمنك على حته روكفون

وتنته طالع (ضحك وصخب تخفت الإضاءة تدريجياً

وترتفع الموسيقى)

(—————)

اللوحة الثالثة

(الأتوبيس - الركاب مستغرقون في الحديث وفي همومهم)

بهجت : يا جماعة دلوقت العدو مش سايبنا فى حالنا.. لازم

ندافع عن ناسنا ولا نسيبه فى بلدنا.. مين اللي

هيحارب.. ما هو ابنى وابنك وابنها.. هى سنة

الحياة كده من ساعة ما ربنا خلق الدنيا.. مش

كده برضه يا حاج.. (مخاطباً الصعيدى)

الصعيدى : ابن الحرام لا بينام ولا بيخلى غيره يتنام..

بهجت : وإذا كان ولدنا بيعملوا اللي عليهم فى

الميدان.. فاحنا كمان لازم نعمل اللي علينا..

المبكانيكى : ماחדش بيقتصر والله.. والواحد بيعمل على

آخر جهد..

السائق : لا من الناحية دى.. الناس عامله الواجب

وأكثر (يتأوه)

الفلاحة : (للسائق) يا كبدى.. رجلك واجعالك.. معلش

استحمل..

السائق : إن كان على رجلى بسيطة أهو المهم نوصل
وبعدين أبقي اشوف لها حل ..

بهجت : المفروض إن إحنا نيجى على نفسنا شوية ..
عشان ولادنا ولخواتنا اللي واقفين فى الصحرا
وسط النار .. نوفر من قوتنا ونديهم ..

السائق : والله النهارده الصبح باقول للجماعة .. عايزين
نخف الشاى شوية .. قالولى والله قتلته أحسن ..

الميكانيكى : ده لو آخر لقمة الواحد يطلعها من بقه ويديها
لهم ..

الأم بورسعيدية : يا ابنى الأكل كثير .. بس اللي له نفس ..

سميحة : اللي خلا العيال ما بياكلوش ..

الفلاحة : كنت أقعد فى ناحية ومحمد ابنى فى ناحية

قدام حلة الرز ماندراش إلا واحنا جايين

عليها .. وامبارح يا حبة عيني .. كنت بابلع

المعلقة بالخناق ..

بهجت : ولما الواحد يلاقى الحاجة غالية قرش والا

حاجة مايتضايقش .. الحاجة الغالية نخف عنها

أو نستغنى عنها خالص أحسن ..

الانتهازى : ولزمتة إيه نستغنى عنها .. هتوقفوا السوق

إيه .. ١٩

المعيدة : فعلاً.. احنا ظروفنا كويسة.. وكل حاجة موجودة..

فى لندن كانوا بيعصرفوا لكل واحد بيضه فى
الأسبوع أيام الحرب..

الفلاحة : (وهى تخطب صدرها) والبيضة تحوق يا لختى.. ده

النفر بيعمسح زوره باقله خمس ست بيضات..

بهجت : وهنروح بعيد ليه.. احنا هنا فى الحرب الثانية ياما

استحملنا مع إن ماكان لناش فيها.. على الأقل دى

حربنا.. بيحارب فيها ولادنا ولخواتنا..

الانتهازى : يا سلام عليها أيام.. ما تتعوطش.. كان فيها قرش..

انفتحت فيها بيوت.. حاكم ربنا خلق ولا مؤاخذه

الحرب دى ليه.. أرزاق أى نعم حرب وكلام من ده..

لكن فيه ناس بتشم نفسها بتطلع لها لقمة نضيصة

ولا مؤلخدة..

الفلاحة : (وقد أحست أن الشوال التى يجلس عليه يهبط بها) يا

لختى انا قاعدة على إيه.. الزكيبة بتنزل من تحت منى

ولا حاسه وانا اقول إيه الحكاية..

التاجر : يا خبر اسود.. الشوال بيجر..

الفلاحة : (وقد اكتشفت إن الجوال ملأن بالسكر) سكر؟! يا

لهوى زكيبة سكر..

الناجر : (غاضباً) لا.. خارج النجف.. ما انتى شايغاه

بعنيكى اللى تتدب فيها رصاصه..

السائق : إنت يا جدد إنت واخذ معاك سكر فى

الأتوبيس.. ما انتتش عارف إن ده ممنوع..

الانتهازى : وياه اللى منعه..!!؟

السائق : عندنا أوامر ماحدث ينقل تموين فى العربية..

الانتهازى : (ميلطجاً) آمال أشيله على كتفى..

بهجت : يا سيد الكلام اللى بيقولهاوك السواق مضبوط

قانوناً.. احنا فى وقت حرب.. واللى بتعمله

ده مش من مصلحة البلد..

الانتهازى : والله اللى عنده كلمة يوفرها على نفسه..

الفلاحة : زكية سكر بحالها يا كافر..

الانتهازى : (مازحاً بثقل ظله) ماجدش ليه دعوة بيه..

الميكانيكى : إنت يعنى ما حدثش مالى عينك فى العربية دى

ولا إيه..

الانتهازى : خليك إنت فى اللى قدامك لتلبس فى حاجة

تضيعنا معاك..

الأم البورسعيدية : وده كلام برضه يا ابنى.. نفر بطوله ياخذ

شوال سكر..

- الانتهازي :** يا ست لا مؤاخذه العيال بتحب الكنافة لا مؤاخذه..
القصة القطايف الحلو فطيرتين..
الفلاحة : ياخى طلعوا عليك بفطير القرافه..
الانتهازي : شوفى إنتى بالذات لوكلهم اتكلموا انتى ما تنطقيش..
لحد لحسن على النعمة من نعمة ربى أكون حادقك
من الشباك..
الفلاحة : يا أخويا اتحدفت فى نار جهنم إنت وفيه زيك..
الانتهازي : طب والله ما أنا عاتقك..
الجندي : (وقد استثار) أنا ساكت لك من الصبح يا جدع إنت..
إنما اللي زيك يظهر ما يجينى بالذوق..
الانتهازي : ما تخليك إنت باحترامك بدل ما تتهزأ..
الجندي : لا.. إنت حلال فيك الضرب.. (يهم بضربه فيوقف
الميكانيكى العرية ويسرع لهما ويحوش الجندي عن
ضرب الرجل)
الميكانيكى : لا.. سيب الحاجات الرفيعة دى.. احنا موفرينكو
للحاجات الكبيرة.. (لانتهازي) انزل يا جدع إنت
شوفك أى داهية تاخذك.. ياللا..
السائق : ينزل فين.. ده هيبات فى القسم..
الانتهازي : سارقين ولا قاتلين..

بهجت : لا مهريين ..
 الانتهازي : انتوا عايزين تلبسونى قضية والسلام ..
 طب شوال السكر ده ما اعرفوش .. مش
 بتاعى .. بتاع الرجل ده ..

(يشير للرجل العجوز الذى لا يفهم شيئاً ويبدو عليه
 الارتباك والهلع)

الأم البورسعيدية : شوف الرجل .. يروح فين من ربنا ده ..؟
 بهجت : والله السجن للى زيك حلال ..
 الانتهازي : لأه .. إنت تقعد ساكت إنت خالص .. إنت
 بيع كلام وأنا هارشك .. مش هاتهننى ..؟
 الخمستين بتوعك دول تعملهم على حد
 تانى ..

الميكانيكى : ما تتكلم عدل ..
 الانتهازي : (متبجحاً لأقصى الحدود) طب اطلعوا على
 القسم على البلا الأزرق حق .. أما أشوف أنا
 والا انتوا ..

الصعيدى : (مستفزاً يخاطب الميكانيكى بلهجة امرأة) روح

إنّتا يا جريبي اطلع بالعربية احنا داخلين ع الليل
ومعانا حريم ومن وقت ركنه وكفايا عطله..

الميكانيكي : ما انتش شايف.. التلاقيح دي ؟! أهو قدامك أه
نعمل إيه..

الصعيدى : لا.. ده حسابه معايا.. حاكم النفر بيبان من
سحنته.. وأنا الجدع ده لله فى الله مش داخلى من
زور من ساعة ماركيت.. (مخاطبًا الانتهازى)
حاكم فيه أنفار زى الحمير ما يجوش الا بالنخس
الولد منصاب فى الكنال.. والإذاعة عم ترص
فى بيانات وطلق نار والركاب اللي له ولد ولا قريب
واحنا مش فايقينك هتقولى رمضان وهنعمل
كنافة وابصر إيه هتاويك ما يتعرفك مكان..

الانتهازى : (محتجًا) إيه هو ده.. كلكوا على..

الصعيدى : طب يلا لم بلاك ده.. وما اسمعلكش حس لغاية
ما نوصل وهنسلمك للقسم أول ما نوصل يا
جبان..

الفلاحة : (مبدية إشفافًا مصطنعًا) يا قلبى.. (تنصحه)

ما انت اللي جيته لنفسك.. لولاك يا لسانى ما
انسكيت يا قفايا..

الانتهازي : الهى يتطريق الأوتوييس ده عليكم يا ولاد الكلب..

الصعيدى : اللى يشيل قلبه مخرومه تخر على راسه..

الانتهازي : عشان شوية السكر.. خدوهم أهه.. طمعانين

فيهم.. خدوهم خدوهم وسيبونى فى حالى..

الله يخرب بيوتكوا..

الصعيدى : يغور طشتك الذهب اللى اطرش فيه الدم.. (ويبدأ

فى معاودة ضربه والرجل يهرب منه زاحفًا

مستنجدًا)

الانتهازي : حوشوه عنى يا جماعة.. (يصرخ كالنساء) غيتونى

يا هو.. هي موتنى.. هي موتنى..

(الميكانيكى يقف بينه وبين الصعيدى حائشًا عنه الضرب)

الصعيدى : سيبنى يا جريبي..

الميكانيكى : معلش كفاية كده عليه.. وأهو اتريى..

الصعيدى : إنت هتحوش عن كل زى ده..

الميكانيكى : معلش.. مسيرة يفهم ويحس.. وأهو كل واحد

بيعمل بأصله والدنيا مليانه الكويس والوحش..

مش كل صوابك زى بعضها (مع الموسيقى ننتقل

إلى ركن فى المسرح يضاء على بيت الميكانيكى وهو

فى حديث مع زوجته.. البيت بسيط فى أثاثه لحد

التواضع)

- للزوجة :** تبقى يا سيدى حتجيب لى كسوة العيال الللى بقالى شهر نابحة حسى عليها..
- الميكانيكى :** يعنى (مضطرباً) الكسوة حتجى حتجى.. من ناحية حتجى إيه الللى مش هيجيبها.. بس كل شىء بأوانه..
- الزوجة :** كل شىء بأوانه.. إنت هتقول شعر يا محمد.. إنت حيرتنى معاك.. أه.. أه تكوشن هتجيب لى غويشة اتعايق بيها..
- الميكانيكى :** هى الغوايش حلوة، أنا ما اكرهش الغوايش ؟
الواحد يقول الحق بس..
- الزوجة :** (مقاطعة) محمد إنت عمال تلف وتدور.. إنت مخبى حاجة عنى.. قولها وخلصنى..
- الميكانيكى :** حميده مرات لخوايا جايه..
- الزوجة :** (وقد لوت بوزها) تيجى يا لخوايا أهلاً وسهلاً..
- الميكانيكى :** طب وضربتى بوز ليه..؟
- الزوجة :** ما انا زى ما انا أه عايزنى ازغوط..
- الميكانيكى :** يا حسنه خلى نفسك حلوة..
- الزوجة :** يا سيدى تيجى، ما دام جايه بطولها.. لوحدها تبقى مبلوعة إنما لما تجر زوربه العيال معاها ماحدث بيطلقها..

- الميكانيكى : العيال أحباب الله يا حسنه..
 الزوجة : فاكروا الواد الصغير أما كان يطلع على الدولا ب
 وينط على السرير لما جاب داغه..
 الميكانيكى : أه ميمى بس الواد دمه خفيف.. تقول اللى لينا
 واللى علينا الواد حرك وفهلوى..
 الميكانيكى : هو شقى شوية إنما الصراحة إيده حلوة، إيده
 خفيفة.. نشانجى درجة أولى.. ده بيقلش العمال
 من البلى بتاعهم كل يوم..
 الزوجة : (تضحك) والثانى اللى قعد يسحف لما وقع فى
 الحله..
 (يضحك الميكانيكى) يا خويا بيحوا.. أهم ياخدوا قعدتهم
 ويتكلوا على الله.. بس تخبى كل حاجة الأطباق والكبايات وتخبى
 القتل ونشيل الكراسى..
 الميكانيكى : ليه كده !؟ دى معنى مش قعدة طيارى..
 الزوجة : يا خبر إسود... هيباتوا يا محمد..
 الميكانيكى : لأهما مش هيباتوا يا حسنه هما..
 الزوجة : باحسب.. يا قاعدين يكفيكو شر الجاين..
 الميكانيكى : دول هيقعدوا هنا يومين..
 الزوجة : (مذهولة) هنا هنا ده فين..

الميكانيكى : أصل اخويا عباس استدعوه فى الجيش وراح
الجبهة..

الزوجة : طب إيه اللى دخل ده فى ده..

الميكانيكى : انتى عارفه العيال شقاي وإذا فضلوا لوحدهم..

الزوجة : يا محمد، يا محمد شوف بس إنت بتعمل إيه.. دى

الحكاية على القد.. ويا دويك يعنى ربنا ساترها..

الميكانيكى : يا حسنه ربنا يبارك فى الوجود.. الموجود بيسد..

انتى قمتى مرة جعانه.. ؟!

الزوجة : دول جرمق يا محمد..

الميكانيكى : يا ستى ربنا يخلى..

الزوجة : يا محمد دى حميده مراته بقها ما بيسكتش

أبدأ ما بتبطلش بلع أبدأ.. والعيال نفسهم

مفتوحة.. وطول النهار ياكلوا ماتعرفش يلوا

الرجيف ازاي..

الميكانيكى : يا حسنه يا حسنه عيب اللى بتقوله ده، انتى

بتبصى للقمه دى كلها حاجات بسيطة..

الزوجة : افرض الأكل مقدور عليه.. طب هيناموا فين.. ده

مفيش حته يناموا فيها..

الميكانيكى : يا ستى الأرض واسعة.. نفرش فى الأرض وننام

والبيت أهو يساعدنا كلنا..

- الزوجة : نفرش ؟.. نفرش إيه يا سى محمد ..
- الميكانيكى : يعنى أقول لك شرق تقولى لى غرب .. بتعاندينى يا
حسنه .. طب على النعمة إن ما انستيتى لآكون
قايـم لك انتى ..
- الزوجة : دى لآرتها يا محمد ، تنكد على والضيوف جايه ..
- الميكانيكى : انتى اللى جبتيه لنفسك ولآد أخويا جايين يا
حسنه ..
- الزوجة : أمرك يا سى محمد ..
- الميكانيكى : تعيشى يا حسنه ..
- الزوجة : هو أنا حاقدـر أعمل حاجة ..
- الميكانيكى : من ناحيه تعملى يا حبيبتى .. أنا عارفك كويس ..
- الزوجة : أنا .. والنـبى أنا لى الجنة يا عينى على ..
- الميكانيكى : يعنى بلاش الحاجات اللى مش هى .. تضربى بوز
تقلبى شكلك تبصى بجنب .. الحاجات اللى
تنقط دى يا حسنه يا حبيبتى ..
- الزوجة : أنا يا محمد آخرة المـتمه تقول لى الكلام ده ..
- الميكانيكى : يا روحى باقول لك عشان تروقى معاهم .. وبلاش
الحركات اللى كنتى بتعملـيها مع أمى .. هه ؟ إيه
رأيك يوم الجمعة نروح الجنينه ..

النزوجة : نروح .. نعمل الأكل من بالليل ونصحى الصبح

بدرى ..

الميكانيكى : وتلقيح الكلام يا حبيبتي .. لعبتك .. وكان ده دين

بنسده لعباس ..

النزوجة : انت حتضحك على عقلى يا محمد .. دين مئين ..

الميكانيكى : صحيح زى القطط تاكلوا وتنكروا .. أول ما جينا

هنا لقينا على طول سكن والاقعدنا عند مين ؟

النزوجة : أه صحيح دى تايهه عن بالى خالص .. أصل ده

شئ له كثير ..

الميكانيكى : وحتى لو ماكانش حصل .. لازم يكون عندنا أصل ..

نسند بعض فى وقت الشدة لحد ما ربنا يفرجها

وكل حى يروح مطرحه .. يا محمد ده احنا نخطهم

فى عينينا .. إن مشالتهمش الأرض نشيلهم فوق

راسنا .. شوفى وحاوليكى السيمى .. أنا عارف انك

جدعة وكلك إنسانية وعارف انك حتفتحى بيتك

لاخويا عباس ومراته ..

النزوجة : بيتهم ومطرحهم ..

الميكانيكى : إسألها كده وتجوزتك ليه ..

النزوجة : عشان حلاوتى .. عشان أصلى .. عشان ادبى ..

عشان

الميكانيكى : أبداً.. كل ده ولا بصيت له.. أنا خدتك عشان
جدعة وانتى من ناحية الحلاوة يعنى نص ليه..
الزوجة : نص ليه.. الله يرحم القعاد على القهوة لانصاص
الليالى ده بلاط حارتنا يشهد عليك من كتر
ما مشيت عليه.. وعنيك فى نص راسك تتمنى
بس اطل من الشباك..

الميكانيكى : (ضاحكاً) يا شيخة يا ريتك ما طلبتى..
الزوجة : كده يا طيب.. الجايات أكثر من الراحات..
الميكانيكى : شفتى بقى.. أديكى نفصتى اللى اتفقنا عليه..
الحاجات والجايات أكثر من الراحات.. كده من
أولها.. هما لسه جم يا حسنه..

الزوجة : لا يا محمد عيب.. ده احنا هنكرمهم أو أدى.. ده
الغرب بيستحملوا بعض، أشحال القرب (يسمع
أصوات كسر كبايات وأطباق ينظر الميكانيكى
وزوجته إلى بعضهما البعض ويقول فى نفس
واحد).. جم..

(—————)

اللوحة الرابعة

(الأثوبيس وقد أشرف على دخول القاهرة)

- الميكانيكى : يا أسطى ، أحوذ ألا اطلع طوالى...!
- السائق : دوغرى - على طول ما تحودش.. بينا وبين مصر بتاع
3 أو 4 كيلو بس..
- سهيجة : نبيل - إصحى ، قوم يا حبيبى قربنا نوصل
خلاص..
- العجوز : إحنا فين دلوقت..
- الجندي : خلاص داخلين على مصر..
- الفلاحة : حمد الله على السلامة..
- بهجت : يا سلام شوفوا احنا كنا فين وبقينا فين ، أهى
الدنيا نفسها رحلة زى دى ، بتبتدى من حته وتنتهى
فى حته ، حمد الله على السلامة ، يا بنتى..
- المعيدة : الله يسلمك..
- بهجت : دى فرصة سعيدة أوى اللى اتعرفت فيها عليكى..
- المعيدة : وأنا سعيدة بمعرفتك..

الأم: مش حنقعد كتير يا بنى عند خالك، عشان الناس يا

بنتى ما تزهقش مننا..

هنى: حاضر يا ماما، زى ما انتى عايزه..

الميكانيكى: عقبال ما نوصل كده بإذن الله لأراضينا اللى

اليهود خدوها..

الأم: يسمع من بقك يا ابنى..

الجندي: هى الساعة كام دلوقت..

بهجت: 5 يا ابنى إلا تلت..

الجندي: كويس هالحق..

(الكل مشغول بتجهيز حاجياته)

الفلاحه: (للاتتهازى) لسه زعلان يا ابنى؟ معلش أصل إيدته

شديدة شوية.. وحكم إنت غلطت برضه وأنا بس اللى

مارضيتبش اتكلم عشان ما أقومهاش، عفرت تغير

أهوجاه على دماغك (الجندي) ناولنى يا حسن

السبت من عندك.. حقه أنا متشكرة منك ومش ها

وصيك بقى على محمد أبو جاد الله..

السائق: (للميكانيكى) تشكر يا عرب، تعبتك معانا، إنما

الشهادة لله إيدك خفيفة على الدريكيون..

الميكانيكى: الله يخليك، بس انت بقى تعمل إشاعة على

رجلك، أحسن يكون فيها حاجة لا سمح الله، هي مافيهاش
حاجة، لكن الواحد برضه ولجب يطمئن..

الأم : على ما نوصل يا منى، إقرى لى جواب عصام..

منى : كفاية بقى قرأيه يا ماما.. إشمعنى النهارده قلقانه كده..

الأم : أصلى شفته امبارح فى المنام.. قال لسه صغير فى ابتدائى

طالع من اللعب كله عرق وشعره نازل على فروته.. عينية

سوده حلوة وحنينه زى الصورة اللى حاطبتيها فى

الصالون.. الصورة الكبيرة.. كل اللى قاله ما تزعليش يا

امه.. قلبى واكلى عليه يا منى (فى ابتسامة من تتذكر)

تعرفى يا منى أحمد كان قد نبيل دوه كان عنده 4 سنين..

إنتى كان عندك وقتها سنتين.. دخل علينا وفى بقه ملبسه..

خالتك زهرة وأولادها كانوا عندنا تحكمت حالقه له شعره

نمرة/3 وكان زعلان وببيعط.. ما استحملش يخاصمنى 5

دقايق.. قرب منى وقال لى عايز أقولك كلمة فى بقلك وقام

حاطط الملبسه بلسانه فى بقى.. كانت مسكره زيه.. خالتك..

زهرة ضحكت

خدته فى صدرى وحضنته.. كان زى اليمامة الدافية

(منى تفتح الخطاب وتبدأ فى قرائته بصوت مرتعش

وهى تحبس دموعها.. يضاء ركن فى المسرح يظهر فيه

عصام بملابسه العسكرية، ويردد هو الآخر كلماته فى
خطابه لمنى، بمعنى أن المتفرج يسمع الخطاب من الاثنين
معاً.. وخطاب عصام يحكى فى بساطة لحظة عبور قواتنا
عبر القناة إلى الضفة الشرقية، ويمكن للمخرج أن يوظف
مساحة كبرى من المسرح يحرك عليها أعداداً من الجنود
فى حركة تعبيرية تجسد تصوره المسرحى للحظة العبور:
الأعلام المرفوعة، دوى المدافع الأجساد المتلاصقة..

الاستشهاد.. النصر.. البهجة وتوازى حركة مجموعة
الجنود كلمات الخطاب وتعبّر عنها مجدولة بأحلام الأم فى
العودة إلى بيتها..)

منى : (تقرأ خطاب عصام) أنا عارف أول حاجة هتسألنى عليها إيه

؟.. ها أقولك يا أمى وهاريحك، بس الأول لازم تعرفنى إنى

مهما قلت مش هاقدر أوصف اللي حصل.. الميه تحتنا

كانت هادية ونضيفة وطيّاراتنا احنا مغطيانا.. عدينا على

كوبرى عاملينه احنا باديّنا.. موجه ورا موجه.. الرجلين

بتدب دبه واحدة.. اللوشوش سمره وجد وشبه بعض،

أول مرة أشوف إن احنا شبه بعض زى ما تكون الوفيات

الأخوات.. العينين واحدة علشان فيها نفس الكلام.. عرفت

فيها إيه لما عرفت فى عيني أنا إيه.. فى عيني انتم رايح لكم

بأمد مع زمائلى .. كل خطوة على القنال خطوة لبورسعيد
خطوة ليكم ..

الأم : السقف يعنى حياخد قد إيه .. مش شوية الطوب والأسمنت
والشبابيك تركب على طول فى ساعتها، تدهنها أخضر ..
لون حلو .. أحمد بيحب الأخضر ..

منى : (تستمر فى القراءة) زى صلاة العيد، من كل حته الله أكبر ..
المدافع ابتدت ما تفتكريهاش مدافع، تفتكريها صريخ،
صريخ فظيع بيوجع الودن، بعد دقيقة ودتك تاخذ على
الصريخ ده، يهدى كل ما صريخ المدافع يعلى كل ما صدرك
يرتاح كل ما يعلا كل الجرح اللى جوانا ما يخف، كل ما
ايدينا تثبت على السلاح ..

الأم : (وهى تحلم ببيتها فى بورسعيد والرجوع إليه) البلكونة،
أحنا بنقعد إلا فيها، نخلى الواد رفعت يركب فيها بريزه
ونخط ليه كبيرة، ما أحنا نعلى السور عشان اللى ماشى فى
الشارع ما يجرحناش ..

منى : حتقولى ما وحشتاكش، أقول لك أبداً — عشان ولا دقيقة
فتناكم — أنا نفسى باستغرب بس هى دى الحقيقة .. عمرنا
ما قربنا منكم قد ما قربنا للنوبة دى، ولا عرفنا قبل كده قد
إيه بنحبكم زى النهارده، فى وسط النهار، فى وسط جهنم

ماحدث بيتهز ولا بيترعش ولا ييهرب.. عشان
شايفينكم قد امنا، وينضرب زى ما نكون كلنا ايد واحدة،
زى ما نكون عاملين ساتر من صدورنا بنحوش عنكم
الرصاص.. خلاص..
الأم: مفيش حاجة عن أحمد..

(منى تبكى - عند هذه اللحظة تكون جموع الجنود قد انتهت
بها للمخرج إلى ذروة اللوحة الحركية التى تجسد العبور وقد
ارتفعت الأعلام.. وكذلك تكون الأم قد فهمت من بكاء منى أن أحمد
استشهد.. ويدوى فى المسرح صوتا عصام وأحمد.. عصام يردد
الكلمات غير المقروءة من الخطاب التى أحستها الأم بوجودها والتى
تصف موت ابنها.. وأحمد يهمس بالكلمات الأخيرة التى تتخيل الأم
أنها تسمعها على البعد...)

عصام: أحمد متسمى عليه بعد ما نرجع..
أحمد: فاكره وأنا صغير طالع السلم جرى وفى إيدى العشا..
سيبى الباب موارب عشان ما تقوميش تفتحى..
عصام: كان لازم حد يعمل اللى عمله.. كان لازم حد يوقف
طابور الدبابات وينقذ أرواح كتير..

أحمد : مش هاغيب عليكى .. أما تنعسى قدام كنكة القهوة فى

الصالة هتلاقينى جنبك باصّب لك فنجانك .. دخلت

ازاى؟ اتسحبت ، هناخد قعدتنا .. وأما أسيبك هامشى

مطمئن .. وانتى هتقعدى مرتاحة .. عشان كل واحد ملا

عينه من التانى .. عشان كل واحد ساكن فى عين التانى ..

عصام : كان لازم حد من المجموعة وأحمد اللى اختار ..

أحمد : مش سامع غير كلامك يا أمى ..

عصام : لبس حزام ناسف وقدر يوقف طابور الدبابات ..

أحمد : كلامك كان إيدين بتربط حزام الديناميت على وسطى ..

شوقك لبيتك حنينك لبلدك كان علم مصر اللى رفرف

فوق تراب سينما (يسمع دوى انفجار ويسقط أحمد

مستشهداً وسط حطام نجمة داوود التى تدوسها

الجموع الزاحفة .. وتنسحب الإضاءة من جهة القتال

وتركز على الأوتوبيس وحده .. وقد جعلت الأم تربت على

كتف منى وتمسح عنها دموعها ..)

الأم : أنا كنت حاسه من الأول .. عشان أنا أمه .. معلش المؤمن

دايماً منصاب .. الطيبين عمرهم قصير .. الطيبين الحلوين

وأحمد كان قمر ما جميل إلا سيدنا محمد .. طول عمرك

شايلنا فى عينك يا أحمد .. طول عمرك .. حتى وأختك

يتحضرلك حاجتك .. كنت مستعجل كنت فرحان
 عشان ترجع لى بيتى عشان تطيب لى جرحى ..
 عشان ترد لى روحى .. ابنى وهو صغير وجايب
 العشا وييجرى على السلم .. غبت يا أمه .. لا يا
 احمد .. أنا شاطر يا أمه .. طول عمرك شاطر يا
 احمد .. أنا طولت أهه يا أمه .. طب هاقول لك كلمة
 فى ودنك .. وحكايات صغيرة .. هيقدرُوا ياخذُوا
 كلامك اللى سمعناه ؟ .. والا لعبك .. ولا ضحك
 يقدرُوا .. مش هيقدرُوا ياخدوك يا احمد .. هتفضل
 صورتك جوه فى عنينا .. وهيفضل حسك فى ودنا
 حس صافى حس غالى جوه قلب القلب ..
 كان رايح ملهوف ع الموت ..

منى :

(يبدأ الركاب فى الالتفات إليهم ويتنبهون إلى ما يحدث والعربة
 توقفت عن السير والكل كان يتأهب لمغادرتها ..)

الفلاحة : الله يا بنتى إنتى بتبكى .. خير إن شاء الله ..

الميكانيكى : معايا أسبرين .. بس تلاقىها داخت من العربية ..

المعبدة : بتعطى ليه .. ١٩ .. فيه حاجة ١٩

سميحة : وهى بتعطى مالها يا مدام .. ١٩ ..

الأم: معلّش سيبوها، أخوها انصاب ومات.. أمر الله..

(يظهر على الكل وجوم كابس ثقيل وسميحة تحتضن طفلها
الذين يبكيان فتدمع عيناها هي الأخرى والفلاحة تشهق إلخ..)

السائق: شدى حيلك..

الفلاحة: يا كبدى..

الصعيدى: سيبوها البنة تفضفض البكا للنسا مش عيب..

منى: أنا مش باعيط عشان لأخويا مات أخويا ماماتش..

طول ما زمايله هناك شايلين السلاح.. أحمد مامتش

طول ما فيه إيد تضرب قلب العدو.. أحمد عايش

باللى عمله.. مش ممكن يموت..

الأم: هدوا علينا بيوتنا.. تقول لهم الله يسامحكم منكم لله

وتتدارى ونبكي..! (وتنطلق فى سيولة مؤثرة فى

ترديد كلمات أحمد التى سمعناها فى الفصل الأول)

ده مش حد داس على رجل حد فى أتوبيس مش حد

رش على حد كباية ميه بارده.. ده مش ميه يا ناس..

ده دم.. دم ناس بريئة.. دم بنت صغيرة لابسة مريلة

وحاطه فى شعرها شريط ولايسه جزمه صغيرة

بفيونكه.. دم ولد شايل العشا ومروح يمد عشان

يوصل قبل ما يبرد.. ذنب عروسة ما لحقتش تتهنى..
وحاكم الكلام ما بقاش هو الكلام.. الضحكة مش هي
الضحكة.. العينين مش هي العينين.. الضحكة مهما علت
فى آخرها طعم مر.. ناس ساييين بيوتهم.. كلامنا
مرعوش.. كلامنا ما بيتكلمش.. عينينا فيها كلام ما
بيتقالش ليه؟ عشان عايشين فى بلد فيها رجل غريبة..
والعمل.. صحيح يا احمد السكة يمكن صعبة يمكن وحشة..
يمكن.. يمكن.. بس مفيش غيرها.. أيوه.. مفيش حاجة
ببلاش؟ كله بتمنه، عايز بلدك ادفع.. وما لحناش غيلان..
ابنى راح يضرب بمدفعه عشان نرجع نمشى فى شارعنا..
ونقعد فى بيتنا.. وترجع الضحكة الصافية تنور عيون
ولادنا عشان نمشى وراسنا مش باصه للأرض.. عندك
حق يا احمد.. خدوا بلدنا بولادهم.. ولحنا هنرجعها بولادنا..
منى: (مندفعة لمقدمة المسرح).. اوعى يا عصام.. آخر طلقة فى
بندقيتك إن ما انضربتش فى صدر العدو كأنها بتنضرب
فينا.. أعلامنا بترفرف على الشط التانى.. وهيجى اللى
يحاولوا ينزلوها تانى.. أحمد لوحده مش كفاية.. عشان
الراية تفضل مرفوعة.. عشان الشجر يزهر.. عشان تسمع
وانت فى مكانك فى قلب سينا نغمة السسمية.. أحمد يا
حبيبى.. وهو بيقع كان بيلم من جوانا كل الأغاني والذكرات

الطولة.. ذكريات الطفولة والشباب يحيطها قدام عينينا..
كأنه يقول النهارده مش يوم حزن.. النهارده الضحكة
الى اتحرمتا منها هترجع ترف فى عيوننا.. العروسة
الى طال انتظارها.. جالها عريسها.. خدها وسافر..
وهيعيشوا عيشة جديدة.. عيشة طولة وهنسمع الزغاريد
ونغنى.. هنغنى يا أمى.. عارفه الولد لما ينزف أمه بتبقى
صعبان عليها فراقه مع إن ده اليوم الى عايشه تستناه..
(تبدأ منى فى غناء الأغنية التى غناها السائق ليتغلب على
إحساسه بالألم وتغالب مشاعر جياشة تخنق الكلمات على حلقها
ويبدأ الجميع فى الغناء معها وتتحدث الأغنية عن وجه مصر
الصباح الذى لن تذهب المحن بإشراقه وعن الأيام المجيدة التى
ستأتياها.. والأغنية بعد لحظات تتحول إلى أغنية سريعة بهيجة
أمله تبشر بالنصر وتؤكداه مهما كانت فداحة ثمنه الذى لن يتوانى
أحد عن سداده.. وتلف الأغنية أرجاء المسرح كله حتى توقظ فى
المتفرجين أنفسهم الرغبة فى الغناء.. وينتهى بذلك العرض..)

المؤلفان

هانس عبد الرؤوف مطاوع

جهال الدين عبد المقصود أبو الحسن



المحتوى

5	* المقدمة
19	* الفصل الأول:
21	- اللوحة الأولى
32	- اللوحة الثانية
43	- اللوحة الثالثة
59	- اللوحة الرابعة
66	- اللوحة الخامسة

81	*	الفصل الثاني:
83		- اللوحة الأولى
92		- اللوحة الثانية
101		- اللوحة الثالثة
115		- اللوحة الرابعة

فصوص مصرية

- 116- المداولة بعد الحكم أحياناً ممدوح فهمي
- 117- الشعب لما يفلسع محمود الطوخى
- 118- الزناتى محمد أمين عبد الصمد
- 119- الجبل د. أحمد الخميسي
- 120- سيف المتنبي السيد الخميسي
- 121- القبة والضريح عبد الفتى داود
- 122- سيف المتنبي السيد الخميسي
- 123- أرض الملائكة السيد فهمي
- 124- حدود مصرية حمدي عبد العزيز
- 125- السبيل أحمد الأبلج
- 126- ٣ X ١٩ مسرحية إستفهامية مصطفى منعد
- 127- قمر بنت (الفجر) ... محمود مكى خليل
- 128- مجن فايف ستارز إبراهيم الحسيني

